

**Supplementum anatomicum, sive, Anatomiae corporis humani liber secundus in quo partium solidarum libro primo descriptarum usus & munia explicantur. Accedit Descriptio anatomica partium foetui & recenter nato propriarum. Item controversia de foramine ovali inter authorem & D. Mery.**

### **Contributors**

Verheyen, Philippe, 1648-1710

Vieussens, Raymond, 1641?-1715. Dissertatio anatomica de structura et usu uteri

Manget, Jean-Jacques, 1652-1742. Dissertatio anatomica de foramine ovali

Verheyen, Philippe, 1648-1710. Anatomiae corporis humani

### **Publication/Creation**

Coloniae : Apud Balthazarem ab Egmond & Socios, 1712.

### **Persistent URL**

<https://wellcomecollection.org/works/th72byda>

### **License and attribution**

This work has been identified as being free of known restrictions under copyright law, including all related and neighbouring rights and is being made available under the Creative Commons, Public Domain Mark.

You can copy, modify, distribute and perform the work, even for commercial purposes, without asking permission.



Wellcome Collection  
183 Euston Road  
London NW1 2BE UK  
T +44 (0)20 7611 8722  
E [library@wellcomecollection.org](mailto:library@wellcomecollection.org)  
<https://wellcomecollection.org>





RAIMUNDI  
VIEUSSENS

Regis Confiliarii & Medici nec-non Academiae Scientiarum  
Parisiensis & Societatis Regiae Londinensis Socii,

DISSERTATIO ANATOMICA  
DE  
STRUCTURA ET VSU UTERI  
ET PLACENTÆ MULIEBRIS.

In quâ nitidè totum Generationis HOMINIS Opus explicatur,  
& Clarissimi VERHEYEN, Supplementi ANATOMICI  
Tractatus V. abundè illustratur.

I  
**C**UM in rebus perpendendis, quas plenius tractare animus  
est, hæc primum inquirenda sint, quæ in ipsis cognitu faci-  
liora videntur; quò scilicet eorum, quæ intrâ textum interius  
illarum altè latitant, indagatio & inventio faciles, quantum fieri  
potest, reddantur; priusquam de internis uteri muliebris partibus  
agam, in describendis externis, quæ pudenda muliebria, nominari  
solent, operam ponam; Siquidem nihil earum complectitur structu-  
ra, quod facilè, opinor, internosci non possit: inter ejusmodi  
partes annumerantur mons veneris, uteri Labia, Clitoris, Nym-  
phæ, & Carunculæ Myrtiformes.

II  
Montis veneris nomine supernam pudendorum muliebrum par-  
tem pubem complectentem intelligo, quæ cuticulâ, cute, glandu-  
lis miliaribus, adipe quodam, ductibus sanguiferis, nervulis, &  
periostio constat; Hujusmodi monti exiles pili, successu temporis  
crassiores evasuri, atque crispandi, circa decimum quartum virgi-  
num annum innascuntur: pili & adeps montis veneris impediunt  
ne in coitu muliebria & virilia pudenda rudiùs inter se collidantur.

*R. Vieussens de Structurâ & Usu Uteri &c.*

*A*

*Uteri*



## I I I.

Uteri labia, quibus, ut & monti veneris circa decimum quartum ætatis annum parvi extrinsecus innascuntur pili magnâ ipsis interjectâ fissurâ vulvæ nomine donatâ ab invicem dispescuntur; ita ut supernâ tantum & internâ sui parte coëant: inferior illorum coitus, ut potè ligamentosæ cutis interjectu factus, frænum nominari solet, exterior labiorum uteri superficies cuticulâ, cute, glandulis miliaribus, adipe quodam, arteriis, venis, & nervulis contextitur: quod attinet ad intimam eorum substantiam, hæc vasis sanguiferis, exiguissimis nervis, & ductibus Lymphatico-arteriosis constat; isti ductus ita plicantur, replicantur, & in semet ipsos convolvuntur, ut iteratis flexionibus suis in glandulas vesiculosas desinere videantur.

## I V.

Interior labiorum uteri facies membranâ cooperitur, cui exilia quibus irrigatur, vasa sanguifera ruborem adeo vividum aliquandò impertiunt, ut exiguissimis ductibus carnosus partim constare videatur, & si reverâ arteriis tantum, venulis, ductibus Lymphatico-Arteriosis & filamentis nervosis constet. Hujusce membranæ textura tenuis adèo ac rara existit, ut pori ejus liberum præbeant comæatum madori seu Lymphatico succo excrementitio, quo semper exterior illius superficies perfunditur ac levigatur: Lymphaticus ille succus excrementitius indefinenter exsudat è ductibus Lymphatico-Arteriosis, glandulas vesiculosas mentientibus, quibus intimam labiorum uteri substantiam partim constare dixi; siquidem tenues ductuum istorum parietes, patentes, quantum par est, poros habent, ut subtiliores ejus, quam devehunt, Lymphæ partes eos permeare queant.

## V.

Bina uteri labia unâ cum Nymphis exeuntis è vesicâ urinæ fluxum ita dirigunt, ut hæc, sive continuo sive interrupto tractu fluat, internam crurum muliebrium partem madefacere nequeat, dummodò paululùm ab invicem diducantur interna eorundem uteri Labiorum superficies ut potè miti quodam madoze continuo perfusa, impedit ne succussus quos patiuntur mulierum & virorum pudenda, dum venereos ruunt in amplexus, & coeunt, dolorem afferant, adèoque naturalem coitus voluptatem, ita imminuant, ut eum ingratum, ne dicam molestum potius quàm jucundum reddant.

## V I.

Clitoris supernam intercapedinis labiorum uteri partem occupans, atque adèo externo cervicis vesicæ orificio superposita, est corpus molle



molle seu laxum, uvulæ magnitudine suâ æmulum quod cruribus duobus, & quatuor musculis constat, tenuique circum vellitur membranâ.

Clitoridis crura quæ utrumque suam originem ab internâ parte ossis pubis ducunt, sunt corpora non nihil spongiosa quæ ad sese invicem accedentia supernâ parte suâ simul coalescunt, mutuoque suo coalitu Clitoridem efformant, quam Anatomici plures levi de causâ specie quadam glandis præditam esse volunt.

## V I I.

Interior Clitoridis substantia arteriis & venis, è ramis iliacis proficiscentibus, filamentis pluribus nervosis, & Lymphatico-arteriosis ductibus constat, qui variis atque variis flexibus suis, vesiculosas mentientibus glandulas, eam nonnihil spongiosam reddunt. Inter Anatomicos alii clitoridem duobus tantum, alii verò quibus assentior, quatuor musculis instructam esse volunt, binis scilicet erectores, & binis acceleratores. Erectores utrimque è margine internâ foraminis ossis pubis nascuntur, cervicis vesicæ lateribus adjacent, & ad Clitoridem accedentes in cruribus illius desinunt, ut & acceleratores, qui ex internâ margine ani proficiscuntur.

## V I I I.

Clitoridis musculi huic erigendæ atque tendendæ dicati sunt: ita sane res est; etenim tantus est Cerebrum inter & uterum nervorum interventu consensus, ut statim atque fæmina viri amore rapta cum eo coire ardenter cupit; spiritus animalis & copiosè & celeriter ad hosce musculos feratur, adeoque illorum contractionem promoveat; ubi verò contrahuntur sanguifera vasa, nec non Lymphatico-arteriosos ductus Clitoridis comprimunt, proptereaque liberum eorum, quos devehunt, liquorum fluxum aliquatenus præpediunt: hinc fit ut Clitoris unâ cum cruribus suis in tumorem asurgat & tendatur.

## I X.

Membrana, quâ Clitoris extrinsecus cooperitur, est eadem ac illa quæ internæ labiorum uteri faciei supersternitur: Hæc membrana circa anteriorem Clitoridis partem ita corrugatur, ut ibi loci aliquatenus penis præputium mentiatur, imò & glandem exigam circumcingat, quâ non pauci Anatomici Clitoridem donatam esse voluerunt: ipsiusmet, dequâ nunc, membranæ textura tenuis adeò ac rara existit ut semper madore quodam extrinsecus sit perfusus, quoniam paulatim manans ex interiori Clitoridis texto succus Lymphaticus excrementitius poros ejus facilè permeat.

## X.

Dum Clitoris fæminæ coitum appetentis unâ cum cruribus suis



in tumorem assurgit, & tenditur, latitantes intra textum illius Lymphatico-arteriosi ductus, ut pote tunc temporis compressi, solito copiosiore effundunt succum Lymphaticum excrementitium: iste autem succus in membranâ nervosâ, adeoque sensu exquisito donatâ, quàm modo descripsi, falsis, quibus imprægnatur, particulis titillationem producit, quæ fæminam cum viro coitutam ita delectat, ut naturaliter fieri non possit, quin illius ad coitum propensionem magis vel minùs adaugeat, prout, scilicet imaginationi ejus magis vel minùs abblanditur

## X I.

Quemadmodum Clitoridis membrana ob strictam officii necessitudinem quam ipsi cum cerebro Deus speciem humanam propagaturus ac conservaturus, esse voluit, quâvis à causâ etiam animâ insciâ titillari minimè potest, quin fæminæ menti coëundi cum viro desiderium illicò subrepat, sic etiam coitus cupiditas in cerebro fæminæ excitari nequit ab ideâ præsentis vel absentis viri dilecti, quin humor ejusmodi membranæ titillandæ dicatus ad eam copiose affluat, eamque titillet; ac proindè illa apta comparata videtur, quæ fæminam titillatione suâ ad venereos amplexus jucundè sollicitet, dummodo in statu naturali sit constituta; quoties enim hujusce membranæ textum, vel solum vel unâ cum texto Clitoridis glutinoso quodam succo ita imbutum est, ut spiritus animalis illud liberè permeare nequeat, sensus illius ita obtunditur, ut suo interdicta maneat vsu, donec ad nativum suum statum sit restituta: ex his facillè intelligitur, fæminas in quibus membrana Clitoridis vel sola, vel unâ cum ipsâmet clitoride obstruitur rarissime ne dicam nunquam lasciviâ laborare; proptereaque illæ velut fæminæ valdè frigido temperamento donatæ, amorisq, nesciæ habentur.

## X II

Ufus quem præstat clitoris, eam unâ cum succingente membranâ morbi furoris uterini nomine donati veram sedem esse satis superque indicare, imò & probare videtur; ac re quidem ipsâ latitantes intra textum interius Clitoridis Lymphatico-arteriosi ductus copiosiore & falsis particulis nimis imprægnatum laticem effundunt, is non solum membranam Clitoridem ipsam succingentem titillat ac vellicat, sed & musculos ejus ita irritat, ut eos in convulsivos motus concitet, jamiam memoratæ Clitoridis membranæ vellicatio, & convulsiva musculorum ejus irritatio, ardens adeò excitant in animâ fæminæ coëundi cum viro desiderium, ut hæc mente capta, & quasi furibunda videatur, donec suo fecerit satis desiderio. Hinc factum ut ardens, ne dicam furens, illud coëundi desiderium furoris uterini nomine donatum fuerit.

Clitoridis descriptioni & usui illius explicationi finem facturum,  
hîc



hîc velut in transcurso dicam non paucos voluisse Anatomicos hanc penem quadantenus referre : verum binæ partes istæ toto Cælo à se invicem discrepant, nam præterquam quod nullus intrâ Clitoridem excavatus fuit a naturâ canalis ; Hæc peni nec figurâ exteriore , nec crassitie , nec longitudine , nec interiori textu assimilis videtur, constat sane Clitoridem in quibusdam fæminis , ac præsertim Ægyptiis in tantam molem accrescere , ut eâ possint abuti : verum huic Clitoridis moli , ut ut magna sit , & peni parva admodum ne dicam nulla interest similitudo.

## XIII.

Externi vesicæ orificii Clitoridi subjacentis , & tuberculum quoddam referentis , lateribus adjacent alæ seu Nymphæ, dimidiâ circiter digiti latitudine donatæ , & ab infimâ Clitoridis parte cui annectuntur ad dimidiam usque marginem exterioris vaginæ ostiî exporrectæ : Hæ sunt corpora subrubra , mollia , flexibilia , tenui, rarissimâque membranâ cooperta, & intercapedine ab invicem separata, quæ parva uteri fissura nominari solet.

Alæ eâdem quâ uteri labia , texturâ interiore gaudent, adeoque velut eorum appendices spectandæ sunt, ita ut nullus sit mirandi locus, quod exterior illarum superficies quodam semper madore perfundatur æc lævigetur, qui impedit ne urina eas salsedine suâ lædat: impediunt Nymphæ unâ cum labiis uteri ne urina dextrorsum vel sinistrorsum resiliat, atque adeò fæminarum crura madefaciat , ut suprâ dictum fuit. Hæ alterum præstant usum, siquidem in coitu miti superficie suâ , blandè penem afficiunt ad faciliorem seminis virilis emissionem, quamobrem a naturâ videtur ordinatum , ut diurnâ veneris consuetudine hæ partes magis excrescant ; atque ita defectus ille titillationis, qui propter vaginæ laxitatem & interiorum rugarum illius obliterationem oriri solet, blandâ earum pressione aliquatenus compensetur ; quò nimirum conjugale vinculum magis potens atque perfectum maneat , ut dixit D. Verheyen Cap. XXI X. Tractatus secundi Anatomix suæ Corporis humani pag. 203.

## XIV.

Binis uteri labiis circâ mediam extensionis illorum partem , exteriùs interjicitur vaginæ ostium, quod in virginibus quæ menstruum sæpe passæ sunt fluorem , latius est quam in junioribus, latius adhuc in lascivientibus , & multò latius in fæminis quæ plures edidere partus.

Exterius vaginæ orificium rugosum esse constat : hinc procul dubio factum, ut Anatomici plures appensas externæ margini ejus rugas, ob quandam cum baccis myrti similitudinem carunculas Myr-



tiformes nuncupaverint; hæc est clarissimorum virorum D. scilicet Sorani, Graaf, & aliorum, rerum Anatomicarum peritissimorum opinio, quam amplecti me veritas cogit.

Exterioris vaginæ orificii rugæ illud in virginibus ita coarctant, ut vix digiti vnius extremum admittere queat; proptereaque virginal claustrum in istis rugis tenuissimis pelliculis invicem nexis consistere, una cum D. Graaf & quibusdam aliis Anatomes Cultoribus facile crediderim. Imò membranam externum uteri ostium sepientem quam ego semel reperi, ut in sequentibus dicturus sum, contra naturæ intentionem existere unà cum eodem D. Graaf existimo, apud quem sequentia de coarctatione orificii vaginæ leguntur. *Verum, inquit, vaginæ orificii coarctationem (nimirum à præfatis illis corrugationibus) in omnibus junioribus virginibus à nobis hætenus dissectis satis clarè conspeximus, magis ac minus prout magis ac minus nobiles existerent: quæ enim sunt admodum matura, haud tantam habent, quantam tenella coarctationem: atque propterea in primo coitu non tanto afficiuntur dolore, nec tam frequenter sanguinem emittunt quam minores, in quibus coarctatio illa plerumque tanta existit, ut, cum fortiori priapo dilatari satis nequeat, dilaceretur, in eoque vasorum sanguineorum contextus disrumpatur, quod semper contingere judicamus, quotiescunque primus coitus cum dolore sanguinolentus evadit.*

## XV.

Partibus naturalibus mulierum externis descriptis, earumque munis explicatis proximè sequitur ut de utero agam; verum antequàm proprium illius textum notum faciam, ejusque usum explicem, partium ad ipsum spectantium descriptioni operam nauabo, quæ externæ illius superficiei adjacent eique strictissimè adhærescunt: bina igitur uteri muliebris cornua describam, ligamenta quatuor, duo nempe lata, & duo rotunda, bina ovaria, tubas fallopianas, & membranas duas, communem scilicet unam, & alteram propriam.

## XVI.

Quod attinet ad uteri cornua, nihil aliud sunt quàm binæ protuberantiæ, juxta latera ipsius fundi sitæ; ipsarum figura, figuram cornuum ex animali prodeuntium æmulatur, hujusce visceris ligamenta rotunda à jam laudatis cornibus prodeunt, inguina versùs deducuntur, & parti femorum internæ atque superiori implantantur, tribus membranis componuntur, una scilicet quæ dicitur communis, & duabus aliis quæ propriæ nuncupantur, communis ipsa vincit eum ligamenti latis, aliisque partibus vicinioribus; ligamentorum rotundorum exterior membrana, membranæ uterî extimæ propago videtur, & fibris carneis partim contextitur, sensu exquisitiori prope  
ortum



ortum donatis; Altera membrana exteriori substrata innumeris glandulis conpersa, & infinitis propemodum arteriolarum atque venularum rivulis irrigata videtur, itaut vterum ipsum longius productum haud malè referat, hæc ligamenta à me descripta diaphragma versus, nimium vteri ascensum gestationis tempore inhibent, ne respirationis lusus lædatur.

## XVII.

Ligamenta uteri lata dicta, quoad figuram, vespertilionis alas haud malè referunt, duabus membranis compaginantur, quarum exterior communis dicitur & peritonæo accepta refertur, intima verò ipsis propria membranæ vteri exterioris propago videtur; hæ membranæ nervorum, arteriarum, atq venarum sylvâ ditatæ observantur, ut & ductibus lymphatico-arteriosis qui ab arteriis promanantes venis inosculantur, ab vteri cornibus ligamenta lata originem ducunt, & parti superiori atque internæ ilium ossium nectuntur: horum beneficio uterus firmiter in suo loco detinetur; frequens ve ipsius extra abdomen exitus inhibetur.

## XVIII.

Ovaria quæ Prisci rei Anatomica scriptores tanquam mulierum testiculos descripserunt, observantur corpora figuræ ad ovalem tendentis, vinculis membranosis parti superiori ac posteriori ligamentorum vteri latorum annexa, pollicem magnitudine æquant: componuntur porrò è duabus membranis, quarum quæ extima est densior videtur & parum albicans à peritonæo producta, altera verò ipsis propria; præter ingentem arteriarum ac venarum numerum quo consistat animadvertuntur hæ membranæ, adsunt etiam jucundo sanè spectaculo innumeri ductus lymphatico-arteriosi, ut & exquisitissima filamenta nervea; in plurimas cryptas dispescitur interior membrana in quibus conduntur quamplurimæ vesiculæ humore limido & seminali turgidæ, quas cum omnibus ferè hujus ævi Anatomicis tanquam vera ova accipio, quamvis fusè admodum de naturâ hujusce ichoris seminalis, *Capite 8. 4. x partis mei novi systematis liquorum corporis humani* disseruerim: attamen nonnulla hic subnectam, indurescit hic liquor, instar ovorum albuminis, dum ignis calori exponitur, si hæ corpora membranosa rotunda, ovata figuræ de quibus huc usque mentionem habui, ovariorum nomine fuerint indigitata, quod ovorum muliebrium sint vera receptacula, nullus forsàn mirabitur me in hanc descendere sententiam, hunc scilicet humorem quem in sinu suo hæc ovaria gerunt, tanquam verum semen fæmineum admittendum esse, & ab eo iuxta Phisicorum & Anatomicorum celeberrimorum sententiam hominem primordia capere, ut extra omnem dubitationis aleam positis observa-



observationibus demonstratum videtur iis qui Eruditorum diaria consulunt, & præsertim sequenti observatione nondum in lucem editâ, sub finem mensis Augusti anni fluentis à D.no Montagnier Celeberrimo atq; Experientissimo Massiliæ Medico, ibidemque mihi communicata.

*Observatio D.<sup>ni</sup> D.<sup>ni</sup> Montagnier Collegio Medicorum Massiliensium Celeberrimo Aggregati. De formatione fœtus humani insolitâ.*

Mulier 30. annos nata, temperamento sicco & Melancholicò; triginta abhinc mensibus nupta, fœlici cum successe ineunte mense februario anni 1697. filiam peperit; mense post partum elapso è domo sua egressa parum adhuc fluentibus lochiis ipsomet exitus die, horroribus internis corripitur, & biduo elapso, in febrem continuam incidit, quam comitabatur pectoris angustia, ut & tumor durus in mamma sinistra, à lacte diu intra ipsius texturam congesto ortus, febre cruciata fuit per 20 dies, tumor evanuit post longam suppurationem, ita ut ineunte tantum Junii mense rebus domesticis vacare potuerit; interim fœtum suscepit, conceptionis nescia, si quidem hæmorrhagiâ vterinâ laborabat vires parum frangente, octo ante obitum diebus, animi deliquium ita vehemens passa est, ut cadaverosam faciem præse ferret, artus summo algore fuere correpti, explorationem fugiebat pulsus, mox totus corporis habitus sudore frigido madebat; his horrendis symptomatibus, remediis à me præscriptis horâ secundâ pomeridiana liberata visa fuit: dein initam agendi viam usque ad ultimum vitæ diem citra ullum grave sanitatis dispendium insistit, recidivam metuens medicamen purgans fœlici cum successe propinavi, quo exhibito, aquas de Meyne dictas manè jejuno ventriculo per biduum potavit; appetitus ventriculi vigeat, lauto utens cibo, rebus domesticis ut antea vacare perrexit; sed irritis omnibus meis conatibus, die sextâ Julii mensis, anni suprâ memorati, horâ 3<sup>â</sup> pomeridianâ, ingens vomitus ipsam torfit, ut & novum animi deliquium: cardiaca remedia in usum adhibita sensus externos suscitarent, sed facies cadaverosa videbatur, artus glaciei instar algidi persentiebantur, pulsus digito exploranti sese quasi subripiebat; interim summo virium languore, & aliquot doloribus internis tantum conquerebatur, incassum fuisse exhibita omnis generis pharmaca, quinque horis post lypothymie paroxysmum elapsis, vitam cum morte commutavit.

Hæc tam stupenda quæ hætenus memoravi symptomata, argumento mihi fuerunt cur fœminæ illius cadaver aperiri rogaverim,  
eo fine



eo fine ut ipsorum causas indagarem. Facta fuit coram me hujusmodi apertio, postridie mortis ejus, à Domino Monginotio, peritissimo Chirurgo Lambeski. Chirurgus ille & ego cum ipso, arbitrati sumus polypum aliquem in Cordis cavitatibus latere; imò & in Pulmone sanguinem aliquem nimis condensatum, ibique retentum. Sed nos fefellit opinio; nulla enim in hisce partibus erat alteratio, quæ sub sensum caderet. Cum apertus esset imus venter, hujus cavitatem vidimus omninò repletam sanguine partim concreto, partim fluido. Dum verò plenis manibus sanguinem hinc hauriebat Dominus Monginotius, bimestrem, aut circiter, foetum animadvertimus, optimè jam efformatum, cum funiculi parte majori umbilico annexâ, & longitudine quatuor transversorum digitorum. Exhausto toto sanguine in imi Ventrìs cavitate diffuso, & apprimè aquâ lavatis visceribus, hæc scrutati sumus, eademque adeo integra invenimus, ut nullum vas sanguineum apertum deprehendere potuerimus: Adeò ut totus sanguis in imam alvum infusus, in hanc conflueret, per Ovarii dextri arterias quasdam, ut ex sequentibus evidenter patebit.

Post agnitionem statum Jecoris, Stomachi, Epiploï, Lienis, Intestino-  
rum, Mesenterii atque Renum, vterum separavimus, cum ligamentis & vaginâ, à partibus vicinis. Cum verò Viscus illud coram ingenti testium numero attentissimè examinarem, nec in hujus nativâ magnitudine, nec in hujus figurâ, nec in propriâ ipsius substantiæ texturâ, ullam esse mutationem, nobis manifestum fuit. Hoc unicum observavimus, nempe orificium colli ejus aliquantulum justo laxius esse, & intra seipsum occultare humorem quendam subalbum, viscidum, & aliquot sanguinis grumis admodum exilibus permixtum, qui internæ superficiiei cavitatis ejus agglutinatus erat.

Testiculus sinister in naturali statu existerat. Quod ad dexterum attinet, qui à Matricis corpore tribus transversis digitis distabat, is visus est nobis sexies sinistro crassior. Cum extimam ejus superficiem examinarem, plura inter binas ejus membranas transpeximus ova, eundemque lacerum reperimus quâ parte tentorio dexteræ Fallopij Tubæ obvertitur. Filo Testiculi hujus partem apertam ligavimus, ut & dexteræ Fallopij Tubæ extremitatem. Aerem in hanc Tubam per frumenti calamus sufflavimus, & observavimus aërem, ut in ejus cavitatem illabebatur, in Testiculum dextrum transire, adeò ut prior duarum istarum partium admodum dilatata fuerit, sed altera magis adhuc sese dilatavit: nam ad ovi gallinacei magnitudinem crevit. Aerem sufflavimus in sinistram Fallopij Tubam, post ligatum hujus Tentorium, sed parum dilatata fuit: Crassities verò naturalis sinistri Ovarii semper immutata remansit. Tandem Ovarij dexteri partes



perscrutati sumus, ibique carnem quandam mollem subrubicundam & vasculis sanguineis permixtamprehendimus, quæ tamen album colorem nacta est, simul ac aqua fuit à nobis abluta. Hæc internæ hujus Ovarii membranarum superficiei adhærebat, ita ut hanc consideraverimus quasi Placentam pueruli, qui in uno ejusdem ovo fuerat efformatus; nec dubitavimus quin totus sanguis qui in imi ventris cavitatem confluxerat, in hanc sensim instillatus fuerit per extrema oscula ipsius arteriarum, quæ à venis separatæ fuerant, ac proinde à fœtu aperta, postquam satis crassus evaserat, ad involucra illa membranacea, quæ ipsum continebant, dilaceranda, sibi que meatum in imam alvum aperiendum. Datum Lambeski ad 17.<sup>mum</sup> Quintilis, anno Domini 1697. Montagnier.

## XIX.

Post asseverationem, quòd Massiliâ Monspelim rediens, fœtum in præcedenti observatione descriptum viderim, cum Lambesko transferem, à Domino Monginotio in spiritu vini asservatum, dicam binas in Utero Tubas à Fallopio demonstratas, corpora esse tertia, concava, & quinque plus minùsve digitos transversos longa, quæque oriuntur è summitate cornuum ejus. Utriusque Tubæ extrema diffusa sunt in modum fimbriæ vasculosæ; idque causa est cur ab Anatomicis Fimbriati corporis nomine insigniantur. Alij Tentoria eadem denominaverunt. A quibusdam præterea morsus Diaboli nuncupata sunt.

Duo illa corpora concava, quibus Tubarum nomen indidit Fallopius, idque sine dubio, quoniam quò longius ab origine suâ discedunt, eò magis diducitur eorum concavitas) componuntur ex tribus membranis, unâ scilicet communi, eâque ferè totâ nervosâ, quæ ad ipsas ex Peritonæo propagatur; & duabus propriis. Propriarum prior contexta est ex duobus carnosorum meatuum generibus; nimirum ex meatibus longitudinalibus & ex transversalibus seu obliquis. Horum meatuum posteriores latent sub prioribus, qui in Fallopii Tubarum Tentorijs, sub tenuissimorum tendinum figurâ terminantur, ut sufficiens robur ipsis tribuatur ad Ovaria firmiter amplectenda, ovaque fœcundata ab illis exolvenda. Propriarum verò membranarum posterior, quæ est quasi continuatio quædam substantiæ uterinæ, partim componitur ex tam ingenti numero meatuum lymphaticorum vesiculosorum, variè convolutorum, ut glandulosa videatur.

## XX.

Carnosi meatus longitudinales Tubarum Fallopii cum uterinis meatibus semper contrahuntur, quod inferiùs explicabimus. Tunc verò effectus bini ab illis procedunt, sine quibus humanæ generationis opus, quod semper in uno vel altero incipitur Ovario, in neutro inchoari nequaquam valeret: dum enim contrahuntur,



fuis extremitatibus tendinosis, Tentoria Tubarum illarum aperiant, eisque simul Ovaria involuunt, ut hæc arctissimè complectantur. Ita ut statim ac seminis virilis spiritus influxit in Fallopij Tubas, hoc ipsum ad sese proripiendum usque ad Ovariorum illorum ova compellant, ut hæc penetret atque fœcundet. Dum meatus carnosī longitudinales duorum corporum concavorum, de quibus loquor, virilis seminis spiritum versùs Ovaria deducunt, horum meatus carnosī transversales eundem ad illa protrudunt contractione suâ, ne scilicet in itinere retineatur. Alium prætereà usum sortiuntur posteriores hi meatus carnosī: Nam ut primum Tentoria Tubarum Fallopij ovum unum fœcundatum ex alterutro Ovario evulserunt, illud vi suâ elasticâ jugiter versùs matricis fundum propellunt, usque dum in ejus cavitatem penetraverit. Facile cuivis erit ex ijs quæ modò dixi colligere, quòd quotiescumque Ovum fœminæ fœcundatum à spiritu seminis virilis, ex Ovario suo, ope Tentorij Tubæ Fallopij quod illud amplexatum est, non evellitur, in illo remaneat. Tunc verò Fœtus ibi formatur, ut pluribus observationibus demonstratum est, eâque inprimis quæ superiùs memorata fuit. His addam, quòd cum Ovum quoddam fœminæ fœcundatum, quavis de causâ in alterutrâ Tubarum Fallopij retinetur, Fœtus in illâ formetur, quemadmodum ab aliquibus Anatomicis observatum est.

XXI.

Hic obiter notari velim quòd actio meatuum carnosorum quorum usus modò explicavi, semper sustineri deprehendatur agitatione continuâ innumerorum ramusculorum arteriarum, qui Fallopij Tubas irrigant. Altera membrana propria Tubarum illarum conducit ad subministrandum, per vasa sua lymphatica vesiculosa succum quendam lymphaticum, aliquantulum viscidum, qui totam externam superficiem ovi fœminei oblinat, quo tempore continetur in cavitate illius ex Fallopij Tubis quæ id recepit, ut quandoque à me fuit observatum. Idem succus lymphaticus est prætereà, quasi quidam viscus, cujus ope Ovum quod illo extrinsecus oblinatur, internæ Matricis cavitati agglutinatur.

XXII.

Dum in principio *novi mei systematis vasorum humani Corporis* explicarem structuram uteri, qui admodum similis esset pyromedioçris magnitudinis, si modò tantillum in anteriori & posteriori parte complanatus esset, dixi illum extrinsecus obductum esse duabus membranis, unâ nimirum communi, alterâ verò propriâ. Communis, quæ tota nervosa videtur, constat ex arterijs, venis, meatibus lymphaticis arteriosis, & tenuibus filamentis seu tubis nervo-



sis, qui ad hos meatus pertingunt, & in horum cavitates insensibiles indefinenter instillant spiritum animale, quem in se comportant. Propria constat iisdem vasis quibus constat Communis; sed hac densior est, quoniam plures habet carnosos meatus, quorum quidam, quos Anatomici fibras longitudinales vocarunt, proveniunt ex superficie externâ fundi Matricis, & in longum excurrunt usque ad ejus collum. Alij verò quos modò Fibras transversales, modò Fibras orbiculares denominant, illam transversâ completuntur, fermè ab ejus fundo usque ad Colli ejusdem extremitatem. Hæc duo meatuum carnosorum genera, adeò plena sunt sanguine in prægnantibus mulieribus, illis præsertim quæ ad graviditatis suæ terminum proximè accedunt, ut totus ambitus externus Uteri, musculosus hac de causâ videatur: sed in junioribus puellis adeò tenues sunt, imò & in mulieribus, minimè gravidis, ut benè distingui nequeant, nisi postquam Uterus aquæ incoctus fuerit duarum aut circiter horarum spatio; vel postquam exutus fuerit membranâ suâ communi, & aëri sicco per horas viginti quatuor expositus.

## XXIII.

Duæ membranæ, quarum modò memini, inter se occultant numerum ingentem vasorum lymphaticorum venosorum quæ oriuntur ex venis exterioribus Matricis, quæque pertingunt ad Receptaculum. Ab internâ earundem membranarum superficie prodeunt innumeri tenuissimi tubi nervosi, qui terminantur in tubos illos meatuum Uteri lymphatico-lacteorum, qui externam ejus superficiem occupant, jugiterque in eorum cavitates infundunt lympham quam devehunt, imbutam copioso spiritu animali: ita ut nulla sit causa dubitandi quin succus lacteus, foetus nutritioni delegatus, hujusmodi spiritu semper abundet, quamvis lymphæ abundans spiritu animali, qui ex visceris de quo loquor membranæ transluit in ejus meatus lymphatico-lacteos, sese illic insinuet in illos tantùm qui occupant superficiem externam, ut modò dixi, sese tamen sensim insinuat in universos; quoniam omnes communionem simul colunt, sicut meatus lymphatico-lactei Placentæ per innumeros tenuissimos ramusculos, qui ortum ducunt ex lateribus alterorum, & ad alterorum latera pertingunt. Nervi partium externarum Uteri, quas hæcenus descripsi, nascuntur ex infimo trium reticulorum nervorum mesentericorum, & ex nervis qui ex Ossis sacri vertebra prodeunt. Hi, cum meatibus lymphaticis arteriosis, formant quicquid membranosi habent hæc partes. Nervi qui oriuntur ex internâ superficie membranæ communis Uteri, sub formâ tubulorum sensum fermè fugientium, ut superius



rius nôtaui, inferuntur præsertim in carnosos meatus prioris ejus membranæ propriæ; qui verò nascuntur ex internâ superficie postremæ hujus membranæ, sese insertum eunt in ipsammet Uteri substantiam, & consequenter in ejus meatus lymphatico-lacteos, ut jam dixi.

## XXIV.

Involucra Matricis membranosa conducunt primò ad impediendum ne varia vasa ex quibus contexta est ordinem suum pervertant, aut disrumpantur, cum immodicè dilatantur ob nimiam copiam nimiamve rarefactionem liquorum quos devehunt. Secundò eadem conducunt ad spiritum animale suppetendum meatibus lymphaticis arteriosis & vesiculosus hujus visceris, per tubulos nervosos, qui oriuntur eorum ex superficie internâ, ut in articulo præcedenti idipsum explanavi. Alterum ex duobus involucris Uteri membranosis, cum sit instructum meatibus carnosus, functionem habet peculiarem, quam tamen non obit nisi duobus diversis temporibus, scilicet quando mulieres cum viris commercium habent, & in postremo graviditatis termino, ut id quàm brevissimè & clarissimè fieri poterit jamjam explicaturus sum.

## XXV.

Quandoquidem nullus est Vir rectè valens, quin cupido rem habendi cum aliquâ fœminâ, in eo celerrimè spiritum animale excitet ad properandum versus musculos erectores veretri, quos ad contractionem adigit eo ipso momento quo ipsorum texturam pervadit; nulla, meo quidem sensu, datur fœmina, quæ lubens sese accingit ad commercium aliquo cum Viro à se dilecto, inquâ imago voluptatis quam sibi procurare sperat, non efficiat ut spiritus animalis defluat ex cerebro & medullâ spinæ dorsi versùs partes genitales, celerius vel minùs celeriter, & copiosius vel minùs copiosè, prout imago quæ spiritûs cursum incitat, vel vividior est vel minùs vivida. Jam vero spiritus ille velocius nec abundantior fluere nequit, quàm fluere solitus est versùs carnosos meatus qui constituunt partem texturæ prioris membranæ propriæ uteri, quin contrahantur. Hoc supposito, verè semper dicetur, quòd in omni actu venereo, meatus carnosus visceris hujus longitudinales, ejusdem Collum ad ipsius Fundum admoveant, & se ipsas contrahendo, ejus Orificium aperiant, ut transitum in cavitatem ejus semini virili permittant. Statim atque semen illud in Uterum immissum est, intra quem meatus ejus transversales illud, saltem ad aliquod tempus retinent, collum ejus contractione suâ constringendo: Statim atque, inquam semen illud in Matricem immissum est, hujus partes, quæ sunt spirituosiores illicò iter intendunt magis patulum & facilius, quod



offertur : Hoc innuere volo quòd in Fallopii Tubas penetrent. Aliæ verò partes sese insinuant in illos ex meatibus lymphaticis arteriosis hujus Visceris qui conducunt ad formandam interiorem cavitatis ejus superficiem ; Illi autem meatus lymphâ continuò repleti, eas cum ipsis deferunt in venas ad quas pertingunt. Id quod initio Articuli hujus asserui adeò verum est, ut fœminæ quæ sese titillare sinunt à viris quos oculis lascivis respiciunt, non tamen veniendo ad actum venereum, ut plurimum sentiant nymphas & labia pudendorum suorum admodum madefieri humoribus, quos vaginæ meatûs carnosî exprimunt ex ejus texturâ, sese contrahendo ; ut in sequentibus explanabo. Nunc verò explicationem aggrediar functionis quam obeunt sub finem prægnationis fœminarum meatus illi carnosî quibus extrinsecè Matrix instructa est.

## XXVI.

Ut fœtus augefcit, vteri cavitas dilatatur, & ut capacior evadit eò longiores fiunt Visceris hujus meatus carnosî membranæ propriæ exterioris ; quò autem longiores fiunt, eò magis augetur in ipsis vis elastica, quæ semper eò tendit ut in priorem tensionis suæ naturalis statum restituantur : Adeò ut vis illa eò usque aucta deprehendatur in fœminis sub finem graviditatis, in illis præsertim quæ vegetâ sanitate gaudent, ut cum meatus, exillis quos longitudinales denominavi, conantur, sese contrahendo, Matricis collum versus ejus fundum admoveere, eodemque tempore orificium ejus aperire, transversales meatus ejusdem latera contractione suâ usquè adeo premunt, ut Infans quem continet, ipsemet eadem opera pressus, omnes quos potest conatus tunc adhibeat ; ita ut simul atque janua carceris in quo novem plûs minûsve menses inclusus fuit, modico hiatu patescit, conatibus suis identidem repetitis, illam tandem prorsus aperiat, & hac ratione viam sibi paret quâ in mundi lucem prodeat.

## XXVII.

Si meatus carnosî prioris uteri membranæ propriæ conducunt ad fœtum ex ejus cavitate protrudendum, eo modo quem explicavi, nulla restat causa dubitandi quin iidem meatus, qui ad statum naturalem ipsi restituendum, indefinenter illum post puerperium vi suâ elasticâ comprimunt, donec totus lacteus succus, qui intra texturam ejus confluit, hinc quasi exprimatur, & in ejus cavitatem detrudatur, ex qua statim effluit partibus sanguinis quibusdam & serositatibus permixtus, sub formâ humorum illorum excrementitiorum qui Lochiorum nomine vulgo donantur.

## XXVIII.

Post descriptas partes singulas quibus Matrix forinsecûs instructa



tructa est, earundemque usus explicatos, ejusdem substantiam ipsam jam nunc describere mihi mens est, cum explicatione peculiarium functionum variorum vasorum quibus constat; ne scilicet aberrem à scopo quem in animo habui, cum hanc dissertationem exorsus sum. Substantia propria Visceris illius quod nunc describo nihil aliud est quam contextus arteriarum, Venarum & meatuum lymphaticorum arteriosorum, in cujus centro latet cavitas convestita membranâ tenuissimâ. Ejus arteriæ varias habent origines, ejusque venæ varias insertiones; nam arteriarum quædam oriuntur ex Emulgentibus, aliæ verò ex Hypogastricis. Dexterâ duarum venarum, quas Spermaticas nuncupant, inseritur in anteriorem partem trunci inferioris Venæ Cavæ; sinistra verò sese insertum it in Emulgentem lateris ejusdem. Quod attinet ad binas venas comitantes arterias quæ oriuntur ex Hypogastricis hæ in ejusdem nominis venas inferuntur. Omnia illa vasa sanguinea totidem sunt canales verè continui. Meatus Matricis lymphatici arteriosi originem suam ducunt ex parietibus arteriarum ejus, & in venarum parietes terminantur: Communionem autem habent mutuam per innumeros ramusculos, qui ex aliorum lateribus oriuntur & ad aliorum latera pertingunt, ut antea dixi.

## XXIX.

Cum uteri meatus lymphatici arteriosi, ut in eo statu sint quo sese possint admodum extendere per totum prægnationis curriculum absque periculo diruptionis, ex naturæ legibus plicati & replicati sint, aliique cum aliis adeò convoluti, ut repetitis suis plicaturis & convolutionibus, formati videantur ex vesiculis invicem assutis, aliisque in alias apertis, illos in *novo meo Systemate vasorum corporis humani*, lymphaticos vesiculosos appellavi, quoniam autem hoc loco eosdem considero relatè ad succum lymphaticum chylo permixtum, quem devehunt jam à Graviditatis exordio usque ad ejus finem eos quidem denominare volo, quo nomine posthac Placentæ meatus censebo, scilicet Lymphatico-lacteos. Etenim si liquidò constet, ut revera constat, meatus illos in mulieribus non gravidis, destinatos esse ad secretionem succi cujusdam lymphatici ab arteriarum ex quibus nascuntur, sanguine, & ad ejusdem deductionem in venas ad quas pertingunt, ut ex eorundem nativo colore cinereo diluto patet. Certissimum insuper est, quòd durante prægnatione devehant quendam succum lymphatico-lacteum quem effundunt in meatus Lymphatico-lacteos, quemadmodum id inferius explanabo. Sequentes observationes, ut opinor veritatem earum quæ modò dixi clarissimè patefacient.

## XXX.

Multoties examinavi tumores carcinomatosos Uteri, quos a-



quâ ritè abluebam, antequam eos aperirem, semperque observavi eorundem substantiam internam, pluribus vasis sanguineis intermistam, esse modò coloris albi subfulvi, modò accedentis ad cinereum dilutum. Jam verò color ille albus tribui non potest nisi succo cuidam lymphatico in vasis suis propriis sensim collecto, ibique condensato. Examinavi etiam attentissimè propriam substantiam Matricis plurium sceminarum, quarum quædam prægnantes mortuæ erant, quædam verò statim post puerperium; semperque in ejusdem dissectione, postquam illam abluissim, aliquando in aquâ fervente, quandoque in aquâ frigidâ animadverti, meatus ejus lymphaticos arteriosos propemodùm sic albos, ut sunt Placentæ meatus lymphatici; quoniam tunc succo quodam lymphatico chyli partibus quibusdam intermixto repleti erant.

## XXXI.

Quandoquidem omnes rami arteriarum Uteri suis extremitatibus non pertingunt ad glandulas, quas illi plures Anatomici perperam tribuerunt, in venas immediatè ibi mutantur, quemadmodum, post Vaginæ descriptionem, id demonstrabo; Eorum usus facillimè manifestari posse mihi videtur. Etenim, supposita sanguinis Circulatione, evidenter patet, prima Visceris illius vasa sanguinea destinata esse ad devehendum in ejus texturam sanguinem in se defluentem ex sinistro cordis ventriculo; secunda verò ejusmodi vasa conducere ad ipsum devehendum in venæ Cavæ inferiorem truncum, qui eundem in Cordis ventriculum dexterum subvehit. Quod attinet ad meatus Uteri Lymphatico-lacteos, hi delegati sunt ad lympham indefinenter separandam, in sceminis non prægnantibus, à sanguine arteriarum, quæ agitatione suâ continuâ magnoperè juvant ad ipsum in venas transmittendum. Per totum autem prægnationis curriculum ab arterioso sanguine separant, non modò lympham aliquam, sed etiam aliquem chylum, qui lacteam formam inducit. Antequam ulterius progrediar, notandum esse monebo, visceris de quo loquor internam partem humidam semper esse; quia scilicet illi ex meatibus ejus lymphaticis arteriosis, qui cavitatis ejus parietes ex parte formant, per poros tunicarum suarum tenuissimarum sensim elabi sinunt partes quasdam subtilissimas lymphæ quam devehunt.

## XXXII.

Si quis à me quæsierit, Cur matricis lymphatico-lactei meatus chylum semper non separent ab arteriarum ejus sanguine? Respondebo, dissectionem accuratam matricis sceminarum quæ dum gravidæ erant mortuæ sunt, illarum præsertim quæ proximè accedunt



dunt ad suum terminum, docet nos arterias ejus longissimè magis dilatatas esse quàm antequam conceperint, sicque anastomoses meatuum lymphatico-lacteorum, quæ ab earum lateribus oriuntur satis eo tempore desciscunt, ad transitum permittendum, non modò lymphæ, sed etiam quibusdam chyli partibus; ita ut ex ijs quæ proximè dixi facilè capi possit, matricem respectu fœtus, quandiù in ejus cavitate retinetur, eandem revera functionem obire, quam obeunt bina matris ubera, statim ac in lucem prodijt.

## XXXIII.

Aliquis forsan à me prætereà quæret, cur postquam pepererunt mulieres, lac ex naturæ legibus ad ipsarum ubera, non autem aliorum subvehatur? Ut ad hanc quæstionem aptè respondeatur, primum notari volo, in mulieribus non gravidis, nihil esse præter matricem & Mammæ, quarum meatus lymphatico-arteriosi apti sint ad lympham meram, certo quodam tempore, devehendam; alio autem tempore succum lymphatico-lacteum. Quod attinet ad fœminas quæ conceperunt, non modò meatus lymphatico-arteriosi partium quæ superius notavi, sed etiam Placentæ meatus destinati sunt ad devehendam lympham lacte oneratam, ut id in sequentibus dilucidè patefaciam. Ita ut tanta intercedat similitudo solum inter Matricem, Placentam & Mammæ, ut quandiù prægnans est fœmina, pars melior lactei succi visceris hujus in Placentam transfluat, eo modo quo id explicabo, postquam utriusque descriptionem dederò: Reliquum verò versùs Ubra subvehitur, præsertim post quartum, quintumve graviditatis mensem usque ad ejus finem. Sed statim ac Matricis arteriæ priorem tensionis suæ naturalis statum resumpserunt, ut illum resumere solent post puerperium, contractione meatuum carnosorum primæ suæ membranæ propriæ, ac denuò coarctatæ sunt anastomoses ejus meatuum Lymphatico-lacteorum quantum necesse est, ut soli lymphæ meræ transitum permittere possint, Mammæ arteriæ tam immodicè dilatantur, quoniam parte illâ sanguinis, quam Matricis arteriæ ampliùs recipere non valent, sese nimium exonerant, ut tunc anastomoses meatuum earum Lymphatico-lacteorum satis aperiantur, ut transfluere sinant cum lymphæ totum chylum quem antea recipiebant meatus lymphatico-arteriosi Matricis; sicque tunc temporis considerari debent, quasi tubi lymphatico-lactei.

## XXXIV.

Si veri sint usus quos diversis vasis ex quibus contextus est Uterus tribui, cum, ut opinor, nulla de eo dubitandi ratio detur, is considerari debet tanquam viscus quoddam cujus duæ ex naturæ legibus functiones sunt in fœminis: Una scilicet priùsquàm con-



ceperint, altera verò postquam gravidatæ fuerint. Et revera in mulieribus quæ non conceperunt Uterus considerandus est quasi verum colum partis lymphaticæ sanguinis earum, quæ perfectè attenuatur, ut circulando per ramusculos infiniti numeri meatuum jeus lymphaticorum vesiculosorum, partes se invicem propellunt motu quem continuò sustinet agitatio arteriarum superjacentium lateribus meatuum illorum.

## XXXV.

Postquam attenuata est lymphæ intra Matricis texturam, in visceris illius venarum cavitatem sese insinuat, ibique permiscetur sanguine quem in illis reperit, & ex qua, saltem ex parte, exantlatur vasis lymphaticis venosis quæ illam in Pecqueti receptaculum devehunt. Lymphæ in receptaculum illud subvecta ibi diluit chylum, cui ibi cum illâ colligitur, eumque imbuat partibus maximè spirituosiss, quæ ipsum disponunt ad sui fermentationem in cordis ventriculis, ut necessum est, ad hoc ut ibi sanguinis formam fortiri possit. Suppositis quæ modò dixi, nulla causa est cur miremur, quòd puellæ aut mulieres in quibus varia matricis vasa impedimentum aliquod habent, à qualibet causâ ortum, perfectâ valetudine nunquam fruantur.

## XXXVI.

Quæcumque hætenus dixi de alterationibus quæ fiunt in peculiari texturâ substantiæ propriæ Uteri fœminarum postquam conceperunt, plusquam, ut mihi quidem videtur, sufficiunt ad demonstrandum, quod isto toto prægnationis curriculo, veri Coli functionem obeat, non solum respectu lymphæ, sed etiam respectu chyli quo permista est. Quoniam verò lacteus succus, ejusmodi lymphâ & chylo constans, transluit ex meatibus lacteis, qui ipsum devehunt ope Placentæ, in venas umbilicales, quibus comportatur in hepatis, ex quo transfunditur in fœtus dextrum cordis ventriculum; an non iusta mihi fuit causa dicendi superius, matricem respectu fœtus, quandiu in ejus cavitate retinetur, eandem obire functionem, quam etiam ejus respectu obeunt matris ubera, statim ac in lucem prodijt: Ideoque Uterus meritò considerari potest quasi prima infantium Mamma.

## XXXVII.

Hoc loco dicam obiter, quandoque contingere ut anastomoses meatuum lymphatico-lacteorum matricis quarundam mulierum temperamenti nimium humidi, adeò patulæ post puerperium remaneant, sive ob nimiam relaxationem texturæ Visceris hujus, sive propter difficultatem pariendi, ut chylus in eas transfluere pergat, eo ferè modo quo per totum graviditatis cursum in eosdem trans-



transfluebat; deinde in matricem infunditur lymphæ commistus, per poros nimis laxos illorum ejus meatuum lymphatico lacteorum qui conducunt ad formandos parietes cavitatis ejus. Hoc autem modo provenit fluxus albus, seu ut clariùs loquar, fluxus lymphaticus chylosus sanguine plerumque permistus, qui rarissimè, ne dicam nunquam, curabilis est: Hoc autem modo, inquam, provenit fluxus lymphaticus chylosus sanguine plerumquè permistus, ei similis quo Parisijs anno 1707. & 1708. laborantem vidi Matronam quandam primi ordinis, adeoque insignem, nedum illustribus suis natalibus, sed etiam eximijs suis meritis, ut ejus memoria, quæ mihi semper in maximo pretio futura est, nunquam de'eri possit ab eorum animo, quos honore consuetudinis reciprocæ dignata est.

XXXVIII.

Uteri superficies interna in quâ plurimos tenues furculos cernere est, præsertim in ejus posteriori parte, naturâ suâ convestita est membranâ, contextâ ex arteriis, venulis, meatibusque lymphaticis infinitè tenuibus. Si Domino Meri peritissimo Anatomico Academiæ Regiæ Parisinæ Scientiarum, quem hæc hæcenus latuit, eandem detegere libet, hæc ipsi sola cura incumbet, primâ, nimirum, occasione datâ, virginis alicujus vel mulieris minimè prægnantis vterum ab ejus collo usque ad ejus fundum aperire, & per aliquot dies macerandum immergere aquæ quam manè & vesperi mutabit; quo factò aquæ partes quæ sub visceris hujus membranam propriam internam illabentur, illam sufficienter separabunt à superficie cavitatis ejus, quæ verò sese insinuabunt in meatus lymphatico-arteriosos, hos inflabunt quantum necesse erit ad eam admodum sensibilem reddendam. Cinereo colori proxima hæc est, sive ad leucophæum accedens, tenuissima, atque pellucida. Hæc est texturæ illius idea, qualis apparet in junioribus virginibus, & in fœminis quæ non conceperunt. Sed sub formâ valde differenti sese ostendit in mulieribus gravidis, quoniam quò magis augetur fœtus, eò magis varia vasa, quæ illius texturam formant, evolvuntur & exporriguntur; & quò magis exporriguntur, eò magis augentur: sive quoniam tunc recipiunt majorem copiam liquorum quos devehere solent, sive quoniam dùm à fœtu comprimuntur, liquores illi, quia cursus eorum tunc non est satis liber, tenentur sese in vasorum illorum cavitates colligere, eademque admodum dilatate. Ita ut per totum prægnationis curriculum, secunda matricis membrana propria seu interna sensim formam acquirat admirabilis cujusdam reticuli, quod Dominus Malpighius ante me agnoverat, ut liquet ex sequentibus verbis excerptis ex ejus de hujus visceris Structurâ dissertationibus *Hinc, inquit, Uteri superficiei, graviditatis tempore pellicula quedam*



adnascuntur , quæ Chorio præsertim & Placentæ connectuntur. Hæ molles sunt & mucosæ , facileque lacerantur. Ab his rete quoddam fulciri & produci videtur , quod cinereis quibusdam & friabilibus componitur corporibus , quæ tereti formâ pollent , & propagatis lateraliter ramis in retis formam implicantur , pisciumque omentum representant. Circa hæ corpora sanguinea ludunt propagines varicosæ ductæ , & versus chorion & Placentam elongatæ ; an exarata corpora reticulariter implicita sint fibra carnea , an nervi , an satius excretoria Uteri vasa , judicabis.

## XXXIX.

Patet ex Autoris hujus illustris verbis , quòd dum examinaret internam Uteri partem foeminæ in graviditate defunctæ , pelliculas primum observaverit internæ cavitatis ejus superficiei adhærentes : ejusmodi autem pelliculæ nihil aliud erant , quàm frustula quorundam meatuum lymphaticorum arteriosorum membranæ propriæ internæ Visceris hujus , quæ ex hac dilacerabantur , ut placentam ab eadem dirimebat ; quæ , inquam , in frustula tunc dividebantur , eoque facilius , quòd ipsemet fateatur , pelliculas illas fuisse molles & viscoso succo imbutas , easque facile lacerari , hæ inquit , molles sunt , facileque lacerantur. Observat deinde pelliculas illas Chorio præsertim & Placentæ adhæsisse. Manifestavit igitur quòd externa Placentæ superficies Chorii productione quadam convellita sit , ac proinde quadam membranâ : Si enim hoc non agnovisset non dixisset , quæ Chorio præcipuè & Placentæ connectuntur , sed dixisset , quæ Placentæ præcipuè & Chorio connectuntur. Attamen Dominus Ruisch hoc inventum sibi vendicavit , quinto Thesauro suo Anatomico , sed nullam ipsi hac de re litem intentabo , quantumvis chara mihi sit memoria Domini Malpighij , quoniam , juxta notum axioma , quòd scilicet mortui semper sint in culpâ , fieri sanè posset ut posterior hic autor causâ caderet , quamvis hæc optima mihi videatur. Cæterùm Dominus Malpighius accuratissimè descripsit reticulum vasculosum sub cujus formâ cernitur secunda membrana propria matricis in gravidis mulieribus , iisque præcipuè quæ prægnationis suæ termino proximiores sunt , quamvis nunquam benè agnoverit membranæ hujus lævorem , ut id satis notum facit , dum fatetur se ignorare an corpora ferè cinerei coloris , teretia , quæ invicem communicabantur , quæque vasa quædam sanguinea comitabantur , fibræ carnosæ essent , an verò nervi , aut Uteri vasa excretoria.

## XL.

Quando Dominus Malpighius dixit , vasa sanguinea resperfa super externam partem meatuum lymphatico-arterialium membranæ pro-



priæ internæ Uteri, disposita in modum reticuli representantis Epiploon piscis, fuisse varicosa, & versûs Chorion & placentam elongata, hoc dixit quoniam observavit, ut id egomet observavi, aliquos ex meatibus lymphatico-arteriosis membranæ de quâ loquor, qui lacerati fuerant quosque vascula quædam sanguineæ convoluta comitabantur, pendula fuisse in superficie internæ cavitatis Uteri, quales esse solent, tunc tantum cum puerperium valde laboriosum efficit ut lacerentur. Matricis membrana propria, quam nuper descripsi, conducit in mulieribus non prægnantibus ad tegendam cavitatis ejus internam superficiem, & ad impediendum ne meatus lymphatico-arteriosi ex illis qui conducunt ad ejus parietes formandos laxiores fiant, horumque pori satis aperiantur, ut ex cavitatibus suis nimis copiosam lympham elabi finant. Illius membranæ functio, toto graviditatis cursu hæc est, ut succum lymphatico-lactæum, quo alitur fœtus, percolet.

## XLI.

Ueteres omnes Anatomici in eâ fuerunt opinione, quod matricis sanguinea vasa menstruum sanguinem subministrarent, ejusque cavitatem ad hoc delegatam esse, ut hunc exciperent; sed ejusmodi functio vaginæ reservatur, quemadmodum id demonstravi *capite 9. partis 4. novi mei systematis liquorum corporis humani, ubi de Fœminarum menstruis disserui*; adeo ut, meâ quidem sententiâ, nulli alii usus, quàm illi qui sequuntur, ad visceris hujus cavitatem referri possint. Hoc nimirum primò conducit ad virile semen in actu venereo recipiendum, secundò id excipit ovum, fœminæ feminis illius spiritu fœcundatum, postquam ex ovario suo fuit evulsum: tertio destinatum est ad ovum idem in se retinendum, usque dum humanæ generationis opus in ovariorum uno perfectè finitum fuerit.

## XLII.

Uterus meatum membranosum habet longitudine quinque digitorum transversorum, qui exporrigitur ab ejus collo, cui annexus est, usque ad marginem foraminis, quod monti veneris subest. Meatus ille, quem Anatomici nomine Vaginæ donaverunt, tribus membranis compositus est, unâ scilicet communi, & duabus propriis. Communis, quæ tota nervosa videtur, quæque ex Peritonæo ad illum provenit, eundem Vesicæ collo alligat & intestino Recto. Componitur autem arteriis, venis, meatibus lymphatico-arteriosis, meatibus quibusdam adiposis & nervis. Prima Vaginæ membrana propria, quæ nihil aliud esse videtur, quàm continuatio quædam membranæ communis Uteri, contexta est ex indefinito numero ramulorum arteriarum & venarum, meatibus lymphatico-arteriosis & filamentis nervosis. Quod attinet ad secundam, hæc textu-



râ suâ non discriminatur à primâ nisi in eo quod instructa est duobus generibus meatuum carnosorum, nimirum longitudinalibus & orbicularibus, quæ sunt continuatio meatuum Uteri. Præterea superficies ejus interna ingenti admodum numero meatuum excretoriorum instructa est. Meatus carnosii longitudinales secundæ membranæ propriæ Vaginæ, qui in longum extenduntur inde ab ejus initio usque ad ejusdem extremitatem, hujus hiatum aperiunt in actu venereo, quia tunc contrahuntur: Orbiculares verò, qui illos amplexantur in modum circellorum, ejus cavitatem contractione suâ coarctant: ita ut meatus illi carnosii efficiant, ut vagina arctè complectatur penem virorum in suo cum foeminis commercio, eumque retineat in situ in quo esse debet, ad hoc ut dum semen ex uretre prorumpit, rectà in Matricis cavitatem devehiri possit.

## X L I I I.

Cùm meatus carnosii longitudinales & orbiculares secundæ membranæ propriæ vaginæ diversimodè ordinati existant, ejus internam superficiem ita corrugant, ut in illâ visantur duo exiguorum sulcorum genera, quorum alii in longum dispositi sunt, alij verò orbiculatim. Imò hæc superficies heteromalli textum aliquatenus imitari, tactuque lenissima deprehenditur, quia scilicet numero indefinito meatuum excretoriorum instructa est, ut superius dixi, quibus indefinenter irrigatur succo quodam lymphatico excrementitio, aliquantulum viscoso, qui ductilem seu mollem illam efficit, & acerbos illos prævertit dolores, quos in actu venereo patiuntur foeminæ, in quibus interiora Vaginæ nimis tensa & quadantenus exsiccata sunt, inopiâ succi illius humidi, qui ipsa naturaliter rigare debet.

## X L I V.

Tubi excretorij quibus interna Vaginæ superficies instructa est, nascuntur ex meatibus lymphatico-arteriosis secundæ membranæ ejus propriæ. Hi autem ad hoc delegati sunt ut sanguinem menstruum in ejus cavitatem infundant. Illi ex hujusmodi meatibus, qui plus minusve tribus transversis digitis positi sunt supra marginem internam orificij Vaginæ, facilè sui distinctionem patefaciunt in foeminis defunctis in curriculo graviditatis admodum provectæ, per extrema sua, quæ formam habent exiguarum papillarum linguæ bubulæ papillis valde similibus, præsertim verò si aquâ fervente intingatur Uterus.

## X L V.

Dum Vagina diffecatur, in ejus extremitate deprehenditur glandularum quoddam stratum admodum notabile suâ densitate & latitudine, quod primæ & secundæ membranæ ejus propriæ interjacet, quodque



quodque exporrigitur usque ad vesicæ collum, quod circumdat. Ab ejusmodi glandulis, quæ sunt vera sedes fluoris ardentis urinæ in mulieribus, fluit modò copiosius, modò minùs copiosè, humor ille lymphaticus excrementitius qui rigat superficiem internam labiorum pudendorum earum, & caruncularum myrti formium.

## XLVI.

Quæ jam jam dixi de meatibus excretorijs & de glandulis, quibus Vagina naturaliter instructa deprehenditur, si priùs suppositæ fuerint, an mirum cuiquam esse debet, quòd fœminæ à viris quos diligunt sentiant pudenda sua. madefieri, etiam ante venereum actum, ut id superius notavi? Quandoquidem tunc carnosus meatus secundæ membranæ propriæ hujusce partis contrahuntur, & sese contrahendo non possint satis non comprimere meatus lymphaticos arteriosos & glandulas ad humorum copiam hinc exprimendam. Horum humorum fluxus fœminis eximiâ virtute præditis, absque ullo fundamento, videtur gonorrhœa quædam, ne dicam pollutionem coram Deo criminofam; sed ejusmodi gonorrhœa nihil aliud est, quàm consecutio cupiditatum & motuum carnis, quos sentire possunt fœminæ vel pientissimæ, cùm sit consecutio cursûs spiritus animalis semper necessaria.

## XLVII.

Nè quid dicendum superfit, si fieri possit, in vaginæ descriptione, hanc observatione sequenti terminabo. Jam à pluribus abhinc annis accersitus fui ad visendam virginem quatuordecim annos natam, quæ à triduo laborabat, in Regione hypogastricâ, dolore qui in momenta acerbior fiebat. Ipsam rogavi, an gravitatem aliquam sentiret in inferiori parte pudendorum suorum? respondit se multum ibi gravitatis sentire, eaque omninò parte dolorem suum, gravitate quadam comitatum & cum aliquâ stranguriâ se acerbius urgere. Hujusmodi responsum occasio mihi fuit, ut jufferim illam ab obstetrice quadam visitari, quæ digiti extremo ad os vaginæ admoto, mihi retulit se tetigisse membranam quandam, quæ impediabat ne digitum usque ad cavitatem ejus infereret. Peritum Chirurgum accersere præscripsi, qui hanc membranam scalpelli cuspide aperuit. Statim ejus apertione factâ, vagina ingenti copiâ sanguinis menstrualis sese exoneravit, qui scilicet in ejus cavitate collectus fuerat. Ægrotâ perfectè convaluit, sanguine illo evacuato, & deinceps functiones ejus naturales debitam regulam constanter servarunt, prosperaque valetudine gavisa est. Hæc observatio, quam etiam ante me fecerunt alij quidam Medici, extra omne dubium ponit, quòd interdum aliqua existat membrana ponè carunculas myrtiformes, quæ penitus Vaginæ os obturat. Sed cùm ejusmodi mem-  
bra-



brana sit quidam Naturæ ludus, imò rarior sit illâ de quâ superius differui, nullatenus licitum esse potest eam considerare ut verum Hymen, ipsam censere, inquam, genuinum virginittatis signum

## X L V I I I.

Si quis cupiat curiositati suæ satisfacere, videndo clarè demonstrata quæcunque hætenus dixi de structurâ partium internarum generationis, legat tantummodò bina experimenta à me adducta. *Capiæ nono partis quarta novi mei Systematis liquorum corporis humani.* Ejusmodi experimenta dabunt ipsi clarissimam ideam naturalis texturæ Uteri, ejusdem ligaminum & Vaginæ. Ea si legerit attento animo, videbit quòd cum mercurius eburneo siphunculo injicitur in ramos hypogastricarum arteriarum, quæ singulas matricis partes irrigant, postquam apprimè filo ligati fuerint trunci venarum quæ ipsas comitantur, præsertim verò si fuerit mulier defuncta in prægnationis suæ curriculo, videbit, inquam, mercurium transfluere ex visceris hujus arteriis, non solum in ejus venas, sed etiam in meatus lymphatico-arteriosos, qui potiore texturæ illius partem constituunt. Ita ut cum examinantur exteriora matricis & vaginæ, finitis injectionibus, cernere liceat primò Mercurium adeò certè penetrasse ex arterijs in venas, ab illarum majoribus ramis usque ad minimos, ut hos tanquam tubos verè continuos repræsentet.

## X L I X.

Observatur secundo, mercurium sese insinuavisse in meatus lymphatico-arteriosos ligaminum latorum Uteri, illosque spectari faciat quasi tubos argentatos infinitè tenues, qui ex arterijs procedunt & in venas terminantur. Omnia illa diversa vasa mercurio repleta apparent in singulis partibus visceris hujus externis, ita simul commissa & convoluta, ut difficile foret illa sine admiratione intueri.

## L.

Observatur præterea, dum examinatur propria matricis substantia, mercurium in hanc immediatè transisse, non solum ex arterijs in venas, sed etiam in meatus lymphatico-arteriosos, qui spectari debent ut totidem canales communicationis, inter hæc duo genera vasorum sanguineorum, quandoquidem indefinenter separant lympham à sanguine quem devehunt priora ex quibus nascuntur, ut eam deferant in posteriora ad quæ pertingunt:

## L I.

Observatur quartò, mercurium injectum in Uteri arterias, in ejus cavitationem non transfluere, nisi quando digitis valdè premittitur ejus textura; tunc enim mercurij aliquæ partes in eum decidunt per poros tunicarum meatuum lymphatico-arteriosorum, conducentium ad formandam



mandam superficiem ejus internam; quoniam illi pori, qui ad hoc destinati sunt, ut sensim influere sinant succum quendam lymphaticum in cavitatem visceris hujus, quo parietes ejusdem humedentur, naturaliter satis patuli sunt, aut saltem satis aperiuntur, ut transitum permittant exiguis mercurij globulis, cum quadantenus violenter premuntur.

## LII.

Animadvertitur præterea, dum aperitur Vagina, totam parietum ejus texturam, mercurio ita imbutam esse, ut nulla sit causa dubitandi, quin differentibus vasis componatur, quæ mutuam inter se communionem colunt; arterijs, inquam, venis, meatibus lymphatico-arteriosis & nervis.

## LIII.

Denique observatur mercurij partem aliquam transmeasse in canalem membranosum de quo loquor, per tubos excretorios, qui ad internam ejus cavitatem pertingunt. Illi tubi excretorij, quos mercurius qui residuus fuit in eorum exiguis cavitatibus valde sensibiles efficit, plerique adeo crassi sunt, tantillum supra os Vaginæ, ut in horum aliquos satis facillè feta suilla introducatur, cujus extremitas usque ad eorum originem produci possit, id est, usque ad meatus lymphatico arteriales ex quibus procedunt. Hic obiter dicam, quòd cum ex omnibus Matricis partibus, sola Vagina tubis excretorijs instructa sit, ipsam quoque solam considerari debere ut delegatam, ad transitum permittendum sanguinis, quem fœminæ singulis mensibus emittere solent, ut id alibi notavi.

## LIV.

Huc usque notam feci naturalem structuram partium tam internarum quam externarum, quibus generatio peragitur, harumque functiones, quam lucidissimè potui, explicavi. Nunc Placentæ descriptionem traditurus sum, postquam ejus texturæ generalem ejusque usûs ideam dederò. Placenta est corpus quoddam molle, figuræ rotundæ, modò minoris modò majoris molis, plerumque uno pollice densum in centro suo, extrinsecus membranis ternis instructum, intrinsecus verò contextum vasis diversis, alijs in alia immediatè apertis, novem mensibus adhærens internæ superficiei matricis, ferè quemadmodum furculus arboris ramo agglutinatæ est, & ad hoc delegatum, ut excipiat & percolet lacteum succum quo alitur fœtus.

## LV.

Ad exordiendam Placentæ descriptionem ab ijs quæ in eâ sunt notiora, primùm sequentibus observationibus probabo illam tribus



membranis instructam esse, ut superius dixi, quarum tertia illam undique tegit. Ne tempus frustra consumam, silentio prætereundam esse arbitratus sum explicationem consistentiæ, figuræ, magnitudinis & densitatis hujus partis fœtus; quoniam digitus & oculus sufficere mihi videntur, ad hoc ut dignoscantur ab illis qui earum structuram examinare volent.

## LVI.

Dum Massiliæ commorarer, ab ultimo die Februarij usque ad decimum octavum Aprilis, anni 1710. Dominus Codonneau & Dominus Olavier ejus gener, jurati Chirurghi magnæ & insignis illius urbis, ita officiosi erga me fuerunt, ut mihi ostenderint tres secundinas trium infantulorum qui etiamnum prosperâ utuntur valetudine, quos mulier quædam recens enixa erat sub finem mensis noni graviditatis suæ. Tres illæ secundinæ erant verè continuæ, unamque tantum immodicæ magnitudinis constituebant. In eâ cernebantur tres densi funiculi, triaque involucra, seu tres cellulæ membranosæ, quæ tres infantulos continebant antequam in lucem prodissent. Quoniam illæ secundinæ ex Utero ferè absque ulla violentiâ expulsæ fuerant, tenuis membrana quæ superficiem externam Placentæ tangebatur, adeo exiguum damnum passa erat, ut hinc occasionem sumserim eam ferè integram ostendendi plerisque Massiliæ Medicis & Chirurgis. Illis præterea ostendi membranam illam continuationem esse membranæ quam posthac Chorion nuncupabo, paucissimæque vasa sanguinea puerperij conatibus lacerata fuisse; cum contra plurima lacerentur ac proinde aperiantur nedum in illâ ipsâ membranâ, sed etiam in illâ quâ interior Uteri pars convestita est, quotiescunque Placenta nimis violenter exolvitur ab internâ Visceris hujus cavitate. Hæc autem est, si hoc obiter hic dicere mihi liceat, vera causa nimis sanguinis effusionis, quæ, prohdolor! nimis frequenter contingit in præmaturis aut difficilibus puerperijs. Id etiam dubio procul causa fuit cur plures Anatomici veteres parum versati in cognitione naturalis œconomix corporis humani, imò & Dominus Meri, crediderint arterias Matricis immediatè aperiri in Placentæ venas tempore conceptionis, arterias verò Placentæ in matricis venas vicissim aperiri; Ex quo collegerunt, sanguinem maternum in corpus fœtus circulari, fœtus verò sanguinem in matris corpus reciprocè circulari. Sed opinionis hujus falsitas, jam à pluribus superioris seculi Anatomicis non modò dissectandi peritis, sed etiam Doctissimis Physicis refutata, evidentissimè demonstrata ostendetur, ex omnibus quæ dicturus sum, dum Placentæ texturam internam ejusque usum explicabo, ut ejus sectatores, meâ quidem sententiâ, illam facillimè repudiatu sint.

## LVII.



## LVII.

¶ Satis mihi non fuit pluribus Massiliæ medicis & Chirurgis ostendere nullam esse inæqualitatem notabilem in externâ Placentæ superficie, de quâ jam loquutus sum, iisque omne dubium eximere, quin membranâ tenuissimâ convestita sit. Ardens enim mea cupido, veritatem magis magisque in dies propalandi, fecit, ut decreverim eadem, si fieri posset, ostendere Medicis quibusdam Monspeliensibus, qui mihi videbantur propensi ad indagandum quicquid Medicinam aliquo modo spectat. Hac de causâ secundinas integras spiritu vini lavi, easque deinde in plumbeam capsam recondidi, cujus operculum ferruminandum curavi, postquam optimo vini spiritu eam opplevissem. Monspelim redux plumbeam hanc capsam relavi, vigesimo quarto die Maii, coram Dominis Lazermo, Fizes, Vyss, Medicinæ Doctoribus in Monspeliensi Facultate, Dominisque Combrieu, Jaquier, Guillemino etiam Doctoribus variarum Facultatum, plurisque Medicinæ studiosis. Statim ac hinc exemissem Secundinas quas Massiliæ in illa incluseram, harum examinavi quendam funiculum, & omnibus illis testibus perspicacissimis ostendi, eum constare unicâ venâ, quæ ad venæ portæ ramum crassum pertingit, cuique circumvolutæ erant arteriæ duæ, quæ nascuntur ab Jliacis, ferè quemadmodum hederæ rami, circumeundo, quorundam arborum trunco annectuntur. Tres illi sanguinei meatus, qui vasa umbilicalia nuncupantur, convestiti erant vaginâ quadam membranosa, subalbâ, satis densâ, quæ nihil aliud esse videbatur quam productio Amnii & Secundinarum, quæ sunt duæ membranæ diaphanæ, quæ modò conjunctæ, modò ab invicem sejunctæ reperiuntur. Ejusmodi vagina cernebatur elevata, & quasi gibbosa, ob quasdam inæqualitates aut eminentias internæ superficiei, quibus nodorum nomen inditum est. Nodi illi nihil aliud sunt quàm dilatatio tunicarum vasorum umbilicalium, quæ ijs tantùm locis efficitur, in quibus liquor ille tenetur majores conatus adhibere, contra illarum parietes, ad solitum suum cursum continuandum.

Ut funiculum diffecabam, observavi primò diametrum cavitatis venæ umbilicalis duplò majorem esse diametro alterutrius arteriarum quæ illam comitabantur, tunicas verò ultimorum horum meatuum multò tenuiores esse tunicis venæ, cujus cavitas nullâ valvulâ instructa est. Observavi secundò sanguinem qui continetur in truncis, imò etiam in ramis venæ & arteriarum Umbilicalium, non modò condensatum fuisse, sed etiam valdè obduratum, acidofale volatilissimo spiritûs vini, ita ut mercurium in earum cavitates injicere nequaquam potuerim, ut harum progressus & insertiones manifestarem, quemadmodum Massiliæ statueram.



Postquam Doctoribus & Medicinæ studiosis à me citatis ostendissem, spiritum vini, naturalem Placentæ lenitatem in solidam consistentiam mutasse, feci, ut observarent eundem adeò coarctasse texturam membranæ, quâ tegebatur superficies ejus externa, ut admodum sensibilis evasisset. Hæc tamen oculorum Domini Mery aciem fugit, cum illam neget in *commentariis Academiae Regiæ scientiarum Parisinæ anni 1708*. Postea Secundinas integras per duas heptomadas macerandas curavi, in quinque sexve sextarijs aquæ quam manè ac vespere mutabam, ut, quantum fieri poterat, vitarem gravem foetorem quem sanguis eis communicabat, dum illum dissolvebat. Quoniam autem aqua paulatim sese insinuavit, nedum inter primam & secundam Placentæ membranam, quæ coaluerant, sed & inter secundam & tertiam, illas adeò bene separavit, septem vel octo dierum spatio, ut tunc ab invicem admodum distinctæ visæ fuerint

## LVIII.

Dominus Hobken qui valdè singulatim omnia perpendit, cum indagaret naturalem structuram diversarum Secundinarum, agnovit numerum harum membranarum, ut liquet ex sequentibus verbis. *Et numeri respectu*, inquit, *prioribus consequenter tres observavi, Amnion, Chorion strictè acceptam, & me diam tenuissimam. Hobkenus § 2.<sup>o</sup> artic. 30 cap. 7.<sup>o</sup> anatom. Secundin. Human.* Ita ut nulla supersit causa dubitandi, quin Placenta contexta sit tribus diversis membranis, quarum tertia expanditur super totam superficiem ejus externam; sic autem illam undique tegit.

Autor jam jam à me citatus melius agnovisset quàm agnovit tertiam Placentæ membranam, si Secundinas quas examinare volebat, in aquâ frigidâ macerari per horas octo & quadraginta tantum non sivisset, ut eam distinguere valeret, sed easdem in aquâ diutius macerari sivisset. Nam aqua ulterius insinuata inter hanc membranam & externam Placentæ superficiem eandem satis dimovisset, ut peritus ille Anatomicus potuisset illam ritè separare; in quo ipsemet fatetur successum votis suis non respondisse, quoniam lacerabatur membrana, inquit, ob ejus nimiam tenuitatem. Ecce ipsissima ejus verba: *Uti postquam frigida per quadraginta horas immersam servassem Placentam, membrana nominata (quamvis equidem aliquâ parte à subjunctâ circum Placentæ limbum notata, texturâ sejunxeram, haud sine dilaceratione, ob tenuitatem non infrequenter contingente) separationem à Placentæ propriâ texturâ iterum institui, sed æquè infelici, quo ante successu. Hobkenus, §. 380. artic. 3. cap. 2. Anatom. Secundin. human.*

## LIX.

Prima trium membranarum Secundinarum, quæ semper continet



net humorem lymphatico-aqueum, vocata fuit amnios ab omnibus Anatomicis qui de illâ scripserunt. Quod attinet ad secundam, quæ cum primâ conduit ad fœtum undique involvendum, alii allantoïdem hanc nuncuparunt, sed perperam admodum, alij Secundinæ nomine eandem donaverunt, quod mereri mihi videtur, nedum quia in puerperio fœtum sequitur, sed etiam quia post amnion occurrit in secundinarum dissectione; alii verò chorion ipsam appellavere, quoniam crediderunt illam solam fulcire omnes venarum ramos & arteriarum umbilicalium, quibus Placenta partim contexta est: sed certissimè hallucinati sunt; quia evidentissimè ostendi testibus quos hætenus citavi, omnia sanguinea vasa, quæ Placentæ superficiem internam occupabant, & varijs in locis se invicem decussabant, Secundinas deferere, ut membranæ aliûs sub ipsâmet immediatè jacentis, texturam trajicerent. Et consequenter tertia hæc membrana Secundinæ subjacens, ut id modò dicebam, Chorion nuncupari debet. Et revera præcisè sub hac membranâ subrufâ & opacâ rami omnes venæ & arteriarum umbilicalium sic invicem connectuntur, se invicem nunc decussantes, nunc verò se invicem lateribus suis tangentes, ut ibi tam egregium reticulum vasorum sanguineorum efforment: ut simile aliud in humano corpore nemo imaginari possit. Hoc vocabo Vasculosum Placentæ reticulum; quoniam ab illo immediatè procedunt omnia diversa vasa quæ texturam ejus efformant, ut in sequentibus id explanabo.

## L X.

Diebus aliquot postquam juvenis quædam mulier Monspeliensis duos infantes enixa esset, sub finem mensis Maij, anni 1710. nono prægnationis suæ mense, binas secundinas, quæ cum geminis infantibus ex Utero prodierant, examinavi; has autem adeò integras comperi, ut tantum abest quin notabiles ullas inæqualitates haberent in superficie suâ externâ, quemadmodum plures Anatomici putaverunt, ut exiguos tantum sulcos in illis animadvertim. Observavit Dominus Ruisch, quinto *Thesauro suo anatomico*, pagina 26. En ipsa ejusdem verba. *Hanc Placentam, inquit, eâ superficie quâ connectitur Utero, illibatam esse: Unde non in multos globulos à se invicem separatos sit subdivisa, sicuti illa nobis plurimum occurrit, ob rudiorum extractionem, sed integra; ita ut tunica villosa seu succosa, de quâ supra egi, hîc ferè illæsam nobis sese videntem exhibeat. Dicta superficies (addit Autor ille) semper, & quidem in statu naturali, succosa nobis occurrit; Illi verò sulci operiuntur dictâ membranâ villosâ, nisi Placenta à rudiori manu in varias particulas disjunctatur.* Dum examinarem membranam quæ Placentæ superficiem externam operiebat, observavi eam nihil aliud esse quam Cho-



rij productionem. Imò idem animadvertit Autor suprà citatus, ut ostendant verba sequentia, excerpta ex 27. pagina quinti *The-sauri ejus anatomici*. Dictas tunicas villosas, inquit, continuas cum eâ parte Chori crassiore, quæ Placentam obducit, eâ facie quæ fœtum respicit, hac oppidò quàm bene hîc cernere licet; & sic constabit, ut antea dixi, Chori partes crassiores, quæ mihi succosæ & villosæ, utramque superficiem Placentæ obducere.

## LXI.

Postquam exteriora binarum Secundinarum, de quibus loquor consideravisssem, in sufficientem aquæ copiam eas macerandas demersi, quam frequenter mutavi. Septem autem diebus elapsis, eas quàm attentissimo potui animo iterum examinavi coram iisdem testibus, scilicet Dominis Lazerme & Fizes Monspeliensibus, VVys Berno-Helvetico, Combrieu Cadurcensi, Guillemino Tolonenfi agri Carolesii, Jaquier Urbis Aneçi in agro Genevensi, pluribusque Medicinæ Studiosis. Hac autem occasione illis Medicis & Medecinæ Studiosis tam evidenter demonstratum est, ut nunquam hac de re dubitare possint, Placentam extrinsecus convestitam esse membranâ tenuissimâ, quia nimirum viderunt mecum, plures partes aquæ, postquam penetraverant totam texturam tum Placentæ cum membranæ de quâ sermo est, sub hanc sese insinuavisse, eandemque admodum sensibilem oculis exhibere. Imò etiam viderunt, partes illas aquæ, aëre permistas, postquam ferè ubique illam separassent à vasis sanguineis, quæ operiebat, illam pluribus in locis ita sustulisse, ut in illâ cernerentur vesicæ membranosæ rotundæ, aliæ majores aliæ minores. Et sic unica illa observatio sufficere poterat ad demonstrandam Placentæ superficiem externam æquè ac internam membranoso involucro obvolutam esse. Ne tamen quicquam omittatur eorum quæ veritatem hanc evidentissimè Domino Mery ejusque sequacibus compertam præstare possunt: eam confirmabo observationibus & experimentis sequentibus Domini Ruysch, qui sane unus ex ævi sui insignioribus viris censeretur, si æquè doctus esset Physicus ac peritus est Anatomicus; verum non omnis fert omnia tellus. Phiala, inquit Autor ille, pagina 16. *The-sauri sui Anatomici quinti*, in liquore conservans portionem membranæ Chori fœtus humani, quam in duas partes, maximè inter se discrepantes, separavi: harum altera tenuissima & pellucida fœtum respiciens; pseudo-alantoidis à me vocabitur nomine in posterum; propterea quod vera alantois in homine non reperiatur: altera autem quæ opaca, crassior, non extensilis, & utramque faciem Placentæ obducens, Chori nomen retinere poterit, (illa enim inservit fulciendis vasis sanguiferis) modò illam portionem, quæ recedit à Placentâ, & per quam rarissimè vasa sanguinea



neâ visuntur dispersa in homine, mihi liceat nominare membranâ Placentæ villosam; usum enim peculiarem obtinere existimo, scilicet quod sit ceu tunica villosa intestinorum tenuium, in quam chylus sese insinuat, ut eò facilius radices vasorum lacteorum & chylum recipere possent, sic quoque succus nutritivus in extremitatibus arteriarum Uteri confusus, & in dictam tunicam villosam sese insinuans, ab venarum Placentæ extremitatibus suscipitur, & ad fœtum per funiculum umbilicalem deducitur.

## LXII.

Domino Ruisch satis non fuit dicere se observasse Placentam naturaliter obductam esse membranâ densâ & opacâ, quâ parte fœtum respicit, tenuissima verò & ad leucophæum colorem accedente quâ parte matricis superficiem internam tangit; voluit enim membranam hanc admodum sensibilem præstare sequenti experimento, quod describitur sub finem pag. 17 & in principio pag. 18 thesauri ejus anatomici quinti, ubi loquitur sicut sequitur.

Dicta portio, inquit inclytus ille anatomicus, tunica chori quæ mihi villosa aut succosa, uteri cavitatem non solum, verum etiam Placentæ uterine faciem quæ uterum respicit, obducit: id quod absurdum & tanquam chimæra plurimis videbitur; attamen, veritati consentaneum esse reperient quæ debito modo per arteriam umbilicalem Placentam ad extremum usque repleverint ceratâ materiâ rubrâ: nam hoc factò, tota placenta (quæ nihil aliud est nisi vasa sanguinea) summâ rubedine perfunditur, & sic in conspectum venit dicta tunica villosa aut succosa cinereo colore prædita, quam si accuratè perscrutatus fueris, Lector benevole, reperies illam esse continuam cum tunica villosâ mihi dictâ.

## LXIII.

Materia fluida coloris rubri quam Dominus Ruisch injecit in arterias umbilicales, communicavit igitur toti Placentæ suum ruborem, nec tamen penetravit in texturam tenuis membranæ, quæ externam ejus superficiem operiebat; quandoquidem hæc colorem cinereum conservavit, quem habebat antequam materiæ hujus rubræ injectio facta esset. Paret autem Autorem istum ex hoc experimento duo colligere consectaria, nimirum, quod Placentæ nihil aliud sit, quàm vasa sanguinea quæ nihil aliud est, inquit, nisi vasa sanguinea; & quod superficies ejus externa obducta sit membranâ cinerei coloris, quæ continua est ipsi chorio, Et sic in conspectum venit, inquit, dicta tunica villosa cinereo colore prædita, quam si accuratè perscrutatus fueris, Lector benevole, reperies illam esse continuam cum tunica villosâ mihi dictâ. Prior duarum harum consecutionum falsa est, nihil enim colligi potest ex vivido rubore toti Placentæ communicato à materiâ quadam fluidâ rubrâ, nisi quod omnia diversa vasa ex quibus composita, est invicem communicentur: Hæc autem communica-



tio minimè probat quod omnia sint sanguinea; quandoqui dem mercurius injectus in arterias latorum ligaminum Matricis, verbi gratiâ, non transmeat ex arteriis in venas solummodò, sed etiam sese insinuet in harum meatus lymphatico-arteriosos. Sic autem materia rubra, quam Dominus Ruisch iniecit in arterias umbilicales, non tantùm in ejus venas transfluxit, sed etiam in ejus meatus lacteos, qui oriuntur ex prioribus horum vasorum sanguineorum, & ad posteriora pertingunt. Itaque omnes Anatomici hujus Professoris injectiones fallaces sunt, quoniam æquè rubicant omnia vasorum genera, cùm contra mercurius illorum colorem nativum satis mutare non possit, ut ab invicem distingui nequeant. Quod attinet ad secundam consequentiam deductam ex suprâ memorato experimento, admodùm legitima mihi videtur.

## LXIV.

Ut veritati testimonium ei debitum feratur, dicam, antequam ulteriùs progrediar, Dominum Hobken agnovisse, Placentam naturaliter undique obductam esse membranâ quadam, eumque consequenter manifestasse, superficiem ejus externam membranâ non carere. En ipsissima hujus Autoris verba, quibus intendit oppugnare illorum opinionem qui placentam corpus quoddam glandulosum esse volunt. *Insuper, inquit, quemadmodùm glandula circumquaque investientes, consimillimâ & continuâ omnino tunica ac membranâ uti fruique solent; ita Placenta una alteraque parte investiuntur quidemque; sed dissimiliter adeò, ut quæ uterum respicientem superficiem investit, propter porositatem, & cum interiore contexturâ communionem, fere tunica nomen non mereatur. Hobkenus § 19 artic. 2. cap. 5. Anatom. Secundin. human.*

## LXV.

Patet ex Domini Hobkeni verbis à me modò allatis, eum facere comparisonem externæ texturæ glandularum, cum Placentæ texturâ. Ait igitur cum omnibus Anatomicis, veras glandulas forinsecus convestitas esse membranâ quadam, cujus textura est prorsus uniformis & continua; & verum est quòd quæcumque muliebris Placenta, unde quaque pariter convestita sit membranâ quadam. *Ita Placenta unâ alterâque parte investiuntur quidem &c.* Sed ait deinde, membranam quæ Placentam extrinsecus operit, differre ab illâ membranâ quâ veræ glandulæ convestiuntur, in eo quod harum textura sit ubique uniformis & continua, illa verò quæ densa est & subrufa, quâ parte superficiem concavam & internam Placentæ fæmineæ tegit, adeò tenuis & adeò porosa sit, quâ parte superficiei convexæ superiacet, ut vix membrana nuncupari mereatur. Ita ut intendat probare discrimine quod intercedit inter  
tex-



texturam membranæ glandularum, & texturam membranæ quâ con-  
vestitur Placentæ, hanc non esse corpus glandulosum. Autor ille  
igitur agnovit totam Placentæ superficiem externam, naturaliter  
membranâ quadam operiri. Imò id agnovit, aut saltem publica-  
vit, priùs quàm Dominus Ruisch, quandoquidem jam à triginta  
annis, Tractatus ejus de Secundinis in lucem prodiit.

## LXVI.

Postquam demonstravi, non modò meis observationibus meis-  
que experimentis, sed etiam observationibus & experimentis Domino-  
rum Ruisch & Hobken, quòd externa Placentæ superficies convesti-  
atur membranâ, cujus usum in sequentibus explicabo. Jam cona-  
bor primam ejus originem patefacere, ut & originem primam cæ-  
terarum membranarum quæ cum illâ Secundinarum partem unam  
constituunt, ne quidquam, si fieri possit, intactum relinquam  
circa materiam quam tractandam suscepi. Ut autem faciliorem red-  
dam hujus propositi executionem, statim observare faciam, quòd  
inter Doctissimos hujus ævi Physicos & Anatomicos conveniat, pri-  
ma lineamenta singularum corporis humani partium, natu-  
raliter in ovo mulieris adumbrata esse. Hoc autem supposito, nul-  
la, ut opinor, causa superesse potest dubitandi, quin Secundina-  
rum lineamenta in eodem Ovo adumbrata sint; siquidem illæ specta-  
ri debent ut pars fœtui essentialis, quæ sola eundem nutrire potest  
incipere, eique per totos novem menses incrementum dare, succo  
lacteò quem Uterus ei subministrat.

Cùm omnes secundinarum partes in muliebri ovo delineatæ sint,  
ut modo deduxi ex principio quod certum hoc ævo censetur, oportet  
necessariò, ut involutum sensibile quod continet quicquid flui-  
dum ovo inest, naturaliter componatur ex tribus illis membran-  
is, quibus instructa est Placentæ. Quoniam verò ex tribus illis membra-  
nis, solus amnios cum secundinis satis extenduntur, dum nutriuntur,  
ut fœtum intra se ipsas includere valeant, oportet necessariò ut cho-  
rion, quod extensionem tantum habet sibi necessariam ad placentam  
involvendam, naturaliter delineatum sit in unâ tantum parte involu-  
eri membranosi ovi fœminei, in hac autem parte chorion intra  
se abscondit prima lineamenta omnium diversorum meatuum qui-  
bus contexta est Placentæ, qui nihil aliud sunt quam rami primorum  
lineamentorum vasorum umbilicalium. Hoc sic statuto, evidens est,  
ut mihi videtur, quòd hominis generatio fieri non possit, nisi quan-  
do mulieris ovum fœcundatum & in matricem delapsum, aggluti-  
natur internæ superficiei cavitatis ejus, parte illâ involucri sui mem-  
branosi, in qua chorion existit, cùm hic sit unicus locus in quo  
sunt primæ radices venæ umbilicalis, quæ solæ ad hoc delegatæ sunt,



ut ex matrice recipiant lacteum succum, qui alere debet prima totius corporis lineamenta, ipsisque incrementum dare, quemadmodum id in sequentibus explicabo.

## LXVII.

Si vera sint quæ jam jam dixi, de quo minimè dubito, nulla est causa cur quisquam miretur, quòd videamus tam multa germina falsa, & tam multa alia corpora extranea, quæ intra Uterum formantur; Nam facilè, meâ quidem sententiâ, capi potest, quòd omnia illa insolita procreata corpora, qualiacumque tandem esse possint, unicè hinc oriantur, quòd ovum fœmineum, tempore conceptionis, internæ superficiei matricis agglutinetur, quacumque aliâ hujus parte quàm illâ quæ à Chorion occupatur; tunc verò sola Secundinarum vasa, quæ Dominus Hobken falsam allantoidem vocat, succum nutritivum recipiunt, quem devehere non possunt in hepar, & deinde in cor fœtus, quoniam sola vena umbilicalis destinata est ad hunc usum. Quæ modò affirmavi, statim confirmabuntur observatione sequenti.

## LXVIII.

Octavo septembris die, anni 1710. Dominus Arnout Generalis præfectus Galliæ Triremibus & Orientali commercio, Massiliæ me detinuit, ut ibi Dominam ejus consortem ictero nigro jam à tribus septimanis laborantem curarem. Jcterum illum comitabantur stomachi dolores ferè continui & acerbissimi, cum frequenti violentissimoque vomitu. Molesta illa symptomata in causâ fuerunt cur ægrotâ, nocte quæ præcedebat primum octobris diem, abortiverit. Jam à sesquimense gravida erat, statim post ejus abortum omnia quæ ex ejus utero protrusa fuerunt examinavi: Secundinas deprehendi magnitudine ferè ovi Gallinæ Indicæ: Placenta mihi visa est composita ex indefinito numero meatuum Lymphatico-vesiculosorum, valde alborum, qui nihil aliud erant quàm tubi lactei vasculis sanguineis intermixti. Secundinæ amnio tam firmiter erant agglutinatæ, ut duæ illæ membranæ Unicam constituere viderentur, quæ undique amplexabatur puerulum perfectissimè formatum, longum plùs minùsve ut media pars digiti auricularis. Secundinas, de quibus jam loquebar, sequutum est corpus quoddam peregrinum paulò majus ovo columbæ domesticæ, figuræ rotundæ ovatæ. Corpus illud erat falsum germen mortuum & subrubrum, cujus externa superficies carnosâ videbatur, quia meatibus carnosâ ex parte contexta erat. Extremitas, quâ internæ cavitati Matricis adhæserat, lacerata cernebatur. Dum germen illud falsum dissecarem, id esse cavum comperi, & nihil aliud cavitati ejus inesse præter sanguinis extravasati grumulos. Postquam illud aperuissem, aquæ idem immisi



mihi septem vel octo horis macerandum. Postea ipsum examinavi, idque nihil aliud esse deprehendi, quàm ovum quod agglutinatum fuerat Uteri parietibus, aliâ parte superficiei externæ involucri sui membranosi, quàm illâ inquâ latebant prima Chorij lineamenta. Hæc autem, sine dubio, fuit causa, cur fortiri non potuerit formam, quam naturaliter fortiri debuisset.

LXIX.

Hoc obiter dicam, ne ab argumento meo nimis longè digrediar, me plurimas vidisse scēminas quæ se gravidas esse arbitrabantur, quoniam earum venter paulatim admodum intumuerat, quæque imi sui ventris statum naturalem, modò nono, modò decimo vel undecimo mense putatæ prægnationis suæ; aliæ quoniam ingentem serositatum copiam per vaginam emittebant, cum membranis in multa frustula discerptis, in quas sensim collectæ fuerant; aliæ verò minimis & tenuissimis ligamentis membranosis. Ita ut cum succi ab Utero secundinis supeditati subsistant in harum texturâ, vel in amnij vel in utriusque texturâ in hanc colligantur, nunc copiosius, nunc minùs copiosè, ibique ordinantur nunc uno, nunc alio modo. Hæc autem de causâ ibi mutantur in corpora mole suâ, consistentiâ, figurâ, imò & colore suo valde diversa. Sed quando ejusmodi succi satis fluidi sunt ad facilè penetrandum in totam Secundinarum & amnij texturam, in illarum hujusque cavitatem defluunt, in illam paulatim colliguntur, imumque ventrem tumefaciunt, prout cavitatem Uteri dilatant.

LXX.

Ut ordinem sequar quem hujus Dissertationis initio mihi proposui, Placentæ structuram perscrutabor, postquam enarravero varias idéas quas de illâ sibi formarunt Autores, qui de eadem scripserunt. Inter Anatomicos qui attentissimè Placentæ structuram examinarunt, alii putarunt hanc hepatis similem esse, quoad propriam suam substantiam, imò & quoad suum usum, eandemque *Matricis fœcus* nuncupaverunt, *hepar Uterinum*. Alij voluerunt eam spleni similem esse, eamque vocarunt *lienem Uterinum*. Dominus Hobken utrorumque opinionem refellens dixit, substantiam ejus externam fibrosam esse, & reticulis quasi nervosis, sanguineis vasis commistis contextam. Ecce ejus verba. *Atque disparitatis ratio, inquit, facilè colligitur ex eo, & agnoscitur, quòd substantiam Placentæ interiorem, à fibrosis ramificationibus, ac pluribus quasi nervosis perartificiosum, sed sine ordine certo ac serie, cum carne parenchimatosa propriâ, contextam, conveniente propaginum perreptantium nervosarum & arteriosarum consortio & amplexu gaudentem, constitui observemus, & efformari.* Hobkenus §. 19. artic. 3. cap. 10. anatom. Secundin. human.



Aliqui inter Anatomicos Placentam spectarunt tanquam Corpus quoddam molle, compositum ex variis vasis sanguineis, ingenti glandularum numero permixtis. Sed Dominus Ruisch vult, propriam ejus substantiam nihil aliud esse quàm contextum ex variis vasis sanguineis, inter quæ nulla existat glandula, ut patet ex verbis sequentibus, excerptis è calce pagina 36 & initio pagina 37. *Thesauri ejus Anatomici quinti. Phiala in liquore continens, inquit Autor ille, Placentam uterinam cum suo funiculo umbilicali, quæ sunt repleta ceraceâ materiâ rubrâ, tunicâ villosâ aut succosâ maximâ parte ablata, luculenter videri potest, totius placenta substantiam nihil esse nisi vasa sanguinea, nullis interjectis ita decantatis glandulis.*

Si Dominus Ruisch demonstravit, ut revera id fecit, Anatomicos illos hallucinatos esse, qui opinati sunt, Placentam glandulis partim constare, ostendam etiam ipsum erravisse, ut jam dixi, quando putavit eam nihil aliud esse quàm vasa sanguinea. Nam statim demonstrabo illam esse contextam ex variis vasis, alijs in alia immediatè apertis, nimirum ex arterijs, venis, meatibus lacteis, quæ fungebantur vice meatuum lymphatico-arteriosorum, prius quàm Ovum muliebri agglutinatum esset internæ matricis cavitati.

Quandoquidem omnia prima Placentæ lineamenta in Ovo foemineo adumbrata sunt, ut id antea probavi, evidens est illam naturaliter latere debere sub membranæ formâ, in uno loco involucri membranosi hujusce ovi; cum hoc ipsum involucrium nihil aliud sit quàm contextum quoddam ex tribus membranis; quemadmodum id demonstravi pluribus experimentis. Quoniam autem corporis membranæ solummodò constant arterijs, venis, meatibus lymphatico-arteriosis, (si hinc excipiantur illæ in quibus ejusmodi vasa permixta sunt tubis adiposis) ut id experimento sequenti ostensurus sum, oportet Placentam, qualis apparet post gravidarum foeminarum puerperium, nihil etiam aliud esse, nisi contextum ex arterijs, venis, & meatibus lymphatico-arteriosis, nervosis.

## LXXII.

Quotiescumque mercurij sufficientem copiam injeci in canis aliqujus arteriam carotidem dexteram, post ligatam sinistram, corpus illud fluidum transmeavit, primum in cavitates arteriarum & venarum piæ matris, deinde sese insinuavit in meatus lymphatico-arteriosos qui nascuntur ex parietibus arteriarum, & terminantur in venarum parietes; ita ut tunc mercurius mihi repræsentaverit piam matrem, sub formâ telæ argenteæ tenuissimæ, contextæ partim ex arterijs albi coloris accedentis ad cinereum dilutum, ex venis quasi



quasi deauratis, mixtione partium mercurij cum sanguine; quem continebant, & meatibus arteriosis, qui prorsus albi apparebant, quoniam arteriali lymphâ repleti erant, permixta mercurij globulis infinitè minutis.

Colligi potest absque ullâ difficultate, ut opinor, ex ejusmodi experimento, & ex quibusdam alijs quæ legi poterunt in operum meorum pluribus locis, quòd Placenta in primâ suâ origine constet arterijs, venis & meatibus lymphatico-arteriosis. Quoniam autem non differt ab eo quod fuit in primo suo principio, quando prorsus efformata est, nisi magnitudine & maximè sensibili mole, quam paulatim in ipsâ effecit nutritivus succus, quem ipsi per novem menses uterus suppeditavit, tum nihil aliud esse debet quam fasciculus arteriarum, venarum, & meatuum lymphatico-arteriosorum, mutuam inter se communionem habentium: meatus illos in posterum vocabo lymphatico-lacteos, quia cùm antequam mulieres gravidæ fiant, vice tubulorum lymphaticorum functi fuerunt, toto graviditatis tempore fungantur vice meatuum lymphatico-lacteorum. Quæ jam jam affirmavi clarissimè patefient sequentibus experimentis & observationibus.

#### LXXIII.

Statim postquam examinassem omnia exteriora ambarum secundarum quæ cum duobus infantibus ex utero prodierant, ventum insufflavi in unâ ex duabus arterijs umbilicalibus, ut autem illum insufflabam animadverti quòd truncus utriusque eodem tempore tumesceret. Deinde mercurium eburneo siphunculo in alteram injeci, qui etiam transmeavit in truncum ambarum arteriarum, per canaliculum arteriosum qui oritur ex unâ & in alteram terminatur. Canaliculus ille arterialis extat in funiculo, sex digitis transversis aut circiter ab umbilico distans: ita ut si una ex arterijs umbilicalibus ab origine suâ obturaretur usque ad funiculi principium, altera hujus defectum supplere posset.

#### LXXIV.

Postquam in funiculo novum inventum de quo jam jam locutus sum obtinuissem, quodque impertivi Domino Mario Melegas Bononiensi Medico, qui aliquandiu Monspelij commoratus est, injectiones mercurij in arterias umbilicales facere perrexì, donec mihi patuit, corpus illud fluidum transmeasse in omnes harum ramos, & in ramos venæ umbilicalis. Injectionibus autem finitis, animadverti Placentam examinando, mercurium transfluxisse ab arterij, non solum in venæ nominis ejusdem ramos, sed etiam in meatus lymphatico-lacteos, qui potiore partem contextûs Placentæ constituent. Secundò animadverti, corpus illud fluidum immediatè ex alijs



his vasis in alia transmeasse : Illa enim omnia repræsentabat tanquam canaliculos verè continuos. Et sic non sine causâ , exhibendo generalem ideam Placentæ , dixi texturam ejus internam diversis vasis alijs in alia immediatè apertis constare. Quoniam autem arteriarum ramij paucum admodum sanguinem aut prorsus nullum continebant , mercurius in earum cavitates transfusus ipsis contulit colorem album ad cinereum dilutum accedentem ; cum contrà mercurius , qui sese insinuavit in ramos venæ umbilicalis , ipsis dedit colorem plûs vel minûs aureum , prout plûs vel minûs sanguinis continebant horum cavitates. Quod attinet ad meatus lymphatico-lacteos, hi prorsus albos sese exhibebant, non modò quoniam horum cavitates nullum sanguinem continebant , sed præterea quoniam parietes naturaliter albi sunt , quemadmodum Dominus Hobken id agnovit. Hic Autor postquam affirmavit , *paragrapho 19. artic. 3. Capitis primi anatomia sue secundinarum muliebrium* , substantiam Placentæ interiorē fibrosam esse & contextam ramis quasi nervosis , permistis arterijs & venis , ait *paragrapho 21. ejusdem articuli* , se observasse quòd vasa illa sanguinea cognosci possint atque distingui colore suo rubeo , à reticulis quasi nervosis Placentæ , quæ alba sunt. En quomodo loquitur. *Hasque propagines tum conjunctim tum seorsim posse cognosci & à plexibus discerni, animadverti ex colore rubicundo , juxta albicantes plexuum memoratorum ductus, quibus conjungebantur, posito ac viso. Hobkenus §. 21. artic. 3. cap. 1. Anatom. Secundinarum human.* Patet ex hujus Autoris verbis quæ modò attuli , eum quidem agnovisse meatus albos in formas reticulorum dispositos , qui contextus Placentæ potiorem partem constituunt , quemadmodum id jam dixi : sed erravit in eo quod cum illos spectare deberet tanquam lacteos tubos , illos censuit meatus nervosos aut quasi nervosos , illorumque ignoravit origines , progressus , insertiones & usus. Erravit præterea cum alijs anatomicis , in eo quod putavit se cum illis in Placentâ observare productiones adiposas , ut ejus verbis ipsissimis utar : nam productiones illæ adiposæ nihil sanè erant quàm meatus lactei , qui albi pinguedinis instar apparebant , propter lac nimis condensatum & in earum cavitatibus retentum. En propria ejus verba. *Dein Chorion membranam sedulo investigantes, præter rugosam texturam jam annotatam, productiones quoque pinguedinis hac parte (quâ putà foetum respexerat) circum circa placenta limbum, innumeris filamentorum albicantium concursuibus contextum, non sine jucunditate, more solito apparere observavimus. Hobkenus. §. 26. artic. 3. cap. 2. Anatom. Secundin. human.*

Tandem observavi , quòd premendo digitis aliquos ramos arteriarum umbilicalium , transmeare faciebam mercurium , quem continebant , in ramos venæ nominis ejusdem , nec tamen extra-



vasabantur: Sed quando meatus lymphatico-lacteos premebam, plures mercurij partes, quæ horum cavitates occupabant, traieciabant eorum parietes; quoniam ejusmodi vasa naturaliter destinata erant ad recipiendum lacteum succum quo fœtus alitur, oportuit ut tenuissima esset eorum textura, ut succus ille in eorum poros sese insinuare posset, quemadmodum id explicabo, postquam retulero sequentes observationes, quæ perfectè confirmabunt quæcumque hætenus dixi, de naturali matricis Structurâ.

Post ritè agnitum modum, quo mercurius transiverat ex ramis arteriarum umbilicalium in ramos venæ cognominis, & in meatus lymphatico-lacteos: Secundinas integras macerandas aquæ immerfi, spatio autem novem aut decem dierum, partes quæ inter ejus membranas sese insinuaverant, easdem ab invicem sejunxerunt, quæ verò in vasa ejus sanguinea penetraverant, ejus texturam paulatim ita relaxarunt, ut tandem omnes arteriæ à venis separatæ fuerint suis extremitatibus. Nunc autem apparuit interior Placentæ textura, & luculentissimè adhuc apparet: hanc enim conservo & conservabo quàm diutissimè potero, in vase vitreo admodum diaphano spiritu vini repleto, ubi apparet sub diversis formis quas notaturus sum. Mercurius qui remansit in truncis vasorum umbilicalium pondere suo funiculum retinet in vitrei vasis fundo, Placenta verò integra, cum tribus suis membranis natat in spiritu vini, ut id transvitrum clarissimè conspicitur: Amnios & secundinæ quibusdam mercurii globulis oneratæ, in spiritu vini fluctuantes, & prorsus ab invicem sejunctas sese exhibent: majores rami vasorum umbilicalium cernuntur interjacentes Secundinis & chorio, qui adhuc plerique in cavitatibus suis aliquid mercurii retinent: interna chorii facies, quæ subrufa apparet, oculis sese exhibet à secundinis penitus separatam: reticulum vasculosum Placentæ, superficiei externæ chorij adhærere cernitur. Clarissimè animadvertitur, omnes ramos arteriarum & venarum qui ab hoc reticulo oriuntur ad invicem sejunctos esse, & unum quemque ipsorum optimè repræsentare paniculam quandam albam; quoniam eo ipso momento quo incipiunt recedere à suis originibus, unusquisque dividitur in ingentem numerum aliorum ramorum infinitè tenuium, qui fluctuantes in spiritu vini, quo aliquatenus ab invicem disjuncti retinentur, paniculam quandam albam repræsentent, ut modo dixi: quoniam verò quò rami vasorum umbilicalium radici funiculi proximiores sunt, eò crassiores sunt, eò etiam majores sunt paniculæ quas efficiunt. Et hac de causâ multò crassior est Placenta in suo centro, quàm in suâ circumferentiâ.

## LXXV.

Ut nullum supersit dubium circa Placentæ structuram, ad ea quæ



quæ hætenus dixi circa illam, sequentes observationes addam.

Dum Placentam examinarem, in eâ sæpeprehendi corpuscula dura subalba, quæ nihil aliud erant nisi succus quidam lacteus retentus, coagulatus & obduratus in suis meatibus lymphatico-lacteis. Cum essem Masiliæ mense Augusto anni 1710. Dominus Bertrand ejusdem urbis peritissimus Medicus, pro suâ humanitate mihi sequentem observationem impertiit. Mihi dixit, quod accersitus die trigesimo Julii ejusdem anni ad fœminam, quæ nono mense gravida erat, quæ pluries per ejus graviditatem menses suos habuerat; eam invenit sanguinis inusitato profluvio laborantem, & acerbis illis doloribus qui puerperium præcedere solent, maximâ cum debilitatē: Addiditque, quòd postquam corroborata fuit potione cardiaca quam ipsi præscripsit, coram se ipso enixa fuerit geminos infantes mortuos, quorum utrumque secutæ sunt suæ secundinæ: utramque Placentam examinavit, totamque utriusque substantiam deprehendit albam & scirrhosam. Jam vero albor & durities duarum harum partium, referri tantum possunt ad lac retentum, & paulatim induratum in suis meatibus.

## L X X V I.

Tertio die septembris ejusdem anni, Dominâ de Serignan puellam enixâ, horâ primâ pomeridianâ, illicò post puerperium quòd felicissimum fuit, secundinas examinavi. Hæ autem amnio prorsus sejunctæ erant. Quidam Anatomici quoniam humorem serosum in earundem reppererunt cavitate, eas vocarunt allantoidem, sed perperam: nam vera allantois amnion intra se non includit, ut illum secundinæ in fœminis includunt: ipsæmet latent in cavitate amnii canis, ovis, verbi gratiâ, pluriumque aliorum animalium. Dominus Crouset peritissimus Chirurgus & Obstetricator, Massiliæ incolæ, Placentam mecum examinans, me rogavit, quænam esset causa, cur tota Placentæ substantia, quæ semper apparere deberet partim rubra propter vasa sanguinea, partim verò alba propter meatus suos lacteos, rubra tamen semper appareret post puerperium? Ipsi respondi, Placentam tantæ molis esse sub prægnationis fœminarum finem ut exolvi non possit ab uteri superficie internâ, & per ejus collum transire, quin undequaque arctissimè prematur, ita ut per compressionem quam ibi patitur, plurima ex ejus vasis sanguineis disrumpantur, & satis sanguinis effundant, ut totum ejus substantiam illo rubefaciant. Ad hoc addidi, quod cum illa fœtus pars diu nimis impedita remanet in suo transitu, sanguis arteriarum ejus, qui tunc liberè in venas transfluere non potest, in lacteos tubos se se insinuet, ipsosque rubro colore inficiat. Ut Domino Crouset ostenderem vera esse quæ dicebam, multoties coram ipso lavi Placentæ frustum.



frustum, undique obductum membranâ, quam ipsi ostendi. Hac autem lotione lactei meatus albos sese exhibuerunt, meatus verò vasorum sanguineorum, quæ sanguinem adhuc continebant rubri remanserunt. Verùm idem non contingit in mulieribus, quæ secundo aut tertio suæ graviditatis mense abortum patiuntur; in iis præsertim quæ plures infantes in lucem jam ediderunt. Nam cùm Uteri collum in illis dispositum sit ad facilem sui relaxationem, cùmque Placentæ moles tunc adhuc exigua sit, per illud exit magnam in illo compressionem minimè patiens; Hac autem de causâ lactei Placentæ tubi naturalem suam albedinem servant, saltem majori ex parte, ut clarè patet ex observatione à me descriptâ articulo.... & ut ex sequente manifestum fiet.

## LXXVII.

Dominus de la Barre, Parisijs oriundus, generalis annonæ præfectus, pro Regio in Hispaniâ exercitu, Monspelium advenit primo mensis Maii die cum Dominâ ejus consorte, quartò vel quintò jam à trimestri aut circiter gravidâ. Matróna illa, quinto post ejus adventum in urbem Monspelium die, violento morbo colico-nephritico correpta fuit, quem comitata est urinx suppressio, quæ septem dierum spatio perseveravit, ita ut ægrota in hydropem hac de causâ inciderit. Paucis post diebus, cùm aperti essent urinx meatus, usu remediorum quæ ipsi præscripti, evanuit ejus hydrops, sed tamen, haud diù post, abortum passa est, & obiit ex inflammatione uteri, septimo aut octavo die postquam abortiverat. Ipso die abortus ejus, aquâ semel tantum ablui secundinas quæ ex ejus utero prodierant cum infantulo haud ita pridem mortuo. Deinde illas perscrutatus sum circiter horam tertiam pomeridianam, coramque plerisque Medicis antehac à me citatis, qui mecum viderunt, externam Placentæ superficiem tenuissimâ membranâ convestitam esse; viderunt præterea hanc nihil aliud esse, nisi contextum ex meatibus lymphatico-lacteis, qui communionem alij cum aliis habebant, & ex vasis sanguineis. Meatus lymphatico-lactei, qui ex arterijs nascebantur & in venas terminabantur, ab illis perfectè distinguebantur, quoniam hæc posteriora vasa rubra cernebantur, propter sanguinem quem in suis cavitatibus continebant; cùm contra meatus lymphatico-lactei æquè albi essent ac merum lac, ob succum lacteum quem devehebant. Aliquos ex meatibus aperui cuspide scalpelli, hos deinde duobus digitis pressi, & ex ipsis expressi liquorem verè lacteum quem argenteo cochleari excepi. Tandem observandum curavi, quòd lacteus albor pedum & manuum infantuli evidenter notarent, illum fuisse nutritum lacteo succo, quem ministraverat uterus maternus; quemadmodum id explicaturus sum, postquam



quam notos fecero usus membranæ quæ Placentam extrinsecus operit, & explicavero modum quo agglutinatur internæ superficiei cavitatis uteri.

## LXXVIII.

Quandoquidem prima lineamenta quæ Placentæ texturam efficiunt insensibilia sunt, dubitari non potest, quin eorum cavitas supra modum exigua sit, & quin liquor qui in ea sese insinuare debet, ut illis incrementum det, eademque sensibilia efficiat, partibus infinite minutis constet. Hæc, dubio procul, causa est cur Homini Creator voluerit, liquorem istum, ad hoc ut subtilissimus fiat, percoletur non modò per texturam propriæ substantiæ uteri, & membranæ quæ internam cavitatem ejus operit, sed etiam per membranam, quæ extrinsecus obvolvitur Placenta: imò hic est usus quem ipsi adscripsit Dominus Ruisch *pagina 16. Thesauri sui anatomici quinti*. Plures sunt intra matricem exigui sulci, quemadmodum id dixi initio articuli..... ita ut cum mulieris ovum fecundatum in ejus cavitatem delabatur, externa illius membrana, admodum lenis, satis facilè sese insinuet in sulcos partis ejus posterioris, eique sensim agglutinetur, ope lymphatici succi aliquatenus viscosi, quo extrinsecus oblitum est, quemadmodum id dixi sub finem articuli 38. Quando muliebris ovi membrana externa internæ superficiei cavitatis uteri agglutinatur, quæ parte Chorion delitescit, ut sæpiùs contingit, ibi annexa remanet plerumque novem mensibus, sub finem verò noni hinc exolvitur, ob rationes à me iuprà allatas.

## LXXIX.

Iis attento quo opus est animo perpenſis, quæ antehac dixi de texturâ & usu uteri & placentæ muliebris, quivis ea nullo, uti mihi videtur, negotio intelliget, quæ de productione & accretione fœtus humani dixi à *pagina 50. novi systematis mei vasorum corporis humani, ad paginam usque 57.* & hæc sunt quæ hîc partim saltem repetere volui, quò nihil desiderari videatur in istâ dissertatione, in quâ totum generationis hominis opus, planè explicare jamdiu in animo fuit.

Cum primùm virile semen, dum vir & fœmina venereos ruunt in amplexus, è feminalibus vesiculis erupit, volatilis & fermentativus illius spiritus salino-acidus parietes vasorum lymphatico-arteriosorum membranæ vteri interiora obducentes poros subit, & in cavitates eorum sese insinuat, ibi lymphatico latici obvio admiscetur, & unà cum ipso in venas uterinas transit, ita ut eo  
citif-



citissimè tota massa sanguinea imprægnetur: vegetus ille spiritus in diversos partium omnium ipsiusmet uteri ductus migrat, eosque suprà modum dilatat, quatenus scilicet diversis intra ipsos reconditis liquoribus admiscetur, eosque in vehementem fermentationis motum concitat: dum hæc ità sese habent, vasa fimbriatas tubarum Fallopiarum extremitates constituentia, ut potè suprà modum dilatata, ità in semetipsa contrahuntur, ut fimbriatæ flexilesque huiusmodi extremitates multum dehiscant, versus varia incurventur, cùm aliò deflectere nequeant, eaque dehiscentibus osculis suis amplexentur. Si quod tunc temporis sit ovum ex ovario suo avulsu facile, hoc juvante subitanæ fermentatione succorum quos intrà se recondit, è vicinis quibus alligatum erat partibus avellitur, & in patentissimum morfus diaboli ostium protruditur; unde pulsationibus sese proximè excipientibus numerosissimarum arterio-  
larum fallopianas irrigantium tubas, veluti totidem repetitis ictibus externo quoque à Corpore incussis in uterum pellitur.

Posteaquam muliebri ovum fœcundatum uteri cavum subiit, pars ea exterioris membranæ illius, intrà quam prima Placentæ rudimenta latitant, in exiguos internæ ipsiusmet uteri superficiei sulcos sese insinuat, adeoque tenuissimæ, quæ hic supersternitur, membranæ ità applicatur, & annectitur, ut lymphatico-arteriosi binarum jam jam memoratarum membranarum ductus sibi invicem communicent, pororum scilicet interjectu, quibus parietes eorum donantur, ità sanè res est, pori parietum vasorum lymphatico-arteriosorum membranæ internæ Uteri in mulieribus gravidis, in poros vasorum lymphatico-arteriosorum exterioris membranæ ovi fœcundati aperiuntur: adeoque facilis inter ejusmodi vasa communicatio stabilitur; ac re quidem ipsâ, succi lymphatico-lactei, quem ductus lymphatico arteriosi internæ uteri membranæ devehunt, defæcatissima portio, lymphatico-arteriosos ductus membranæ gibbæ Placentæ superficiem obducentis, & veri coli vices gerentis, indefinenter subit, eorumque interjectu, vasa lymphatico-arteriosa, quibus cum communicant, ipsiusmet Placentæ transit, ubi lymphatico lactici obvio admiscetur, & unà cum eo in cavitatem ramorum venæ umbilicalis transit, ac deinceps in dextrum Cordis fœtus ventriculum defertur, ubi pluribus iteratis circulationibus veram sanguinis formam adipiscitur.

## LXXX.

Hæc, quæ mox dixi, observationes quas superius in medium attuli, apertissimè demonstrant, & si quæ in iis suspicio dubii superesset,



hanc sequens experimentum facile tolleret: mercurius in cavitatem arteriæ Carotidis dextræ canis à duobus circiter mensibus gravidæ immissus, arteriâ Carotide sinistrâ ligatâ, in venam umbilicalem catulorum transit absque vllâ vasorum ruptione, uti vigesimo experimentorum meorum fusè explicui, atque adeò nequaquam dubitandum est, quin vera facilisque sit communicatio inter ductus lymphatico-arteriosos uteri & Placentæ, cujus ope succus lymphatico-lacteus fœtum nutriturus ad venam umbilicalem transmittitur.

## L X X X I.

His sic constitutis, hoc in posterum, ut mihi videtur, extrâ omnem omninò controversiam positum esse debet, nimirum lymphatico-arteriosa uteri vasa, statim à Conceptione, lymphatico-arteriosis membranarum ovi in cavitatem illius delapsi ita coalescere, ut hæc sint habenda tanquam ductus quodammodo continui, qui in parietibus propaginum venæ umbilicalis per universam Placentam disseminatarum terminantur, & lymphatico-lacteum, quem devehunt, succum fœtus nutritioni dicatum in cavitates illarum exonerant, ubi cum sanguine miscetur: Licet vasa, de quibus mox dixi, ante conceptum merè lymphatica essent, cum utraque nihil præter lympham deveherent; hæc non levi fundamento, postquam utero concepit mulier, lactifera nuncupari possunt; cum toto prægnationis tempore lymphatico-lacteum succum devehant, ut suprâ indicavi: ex jam dictis clarè patet quam Uteri partem, arripuit Placenta, eam in ipso latenti adhuc infanti id ipsum præstare, quod postmodum producto in lucem mamma utraque præstat; chylosam scilicet spiritu animali saturatam, ut cuique notum est, materiam secernit à sanguine, matrique præripit infantis causâ: quapropter nemini mirum esse debet, quod Articulo. 36. muliebrem uterum velut primam hominis mammam habendum esse dixerim.

## • L X X X I I.

Dùm puriores succi lymphatici intrâ uteri texturam percolati & defœcati partes, ad fœtum, eâ quâ supra explicatum fuit ratione, transmittuntur, reliqua ejus portio ad venas uterinas amandatur, non solum ut eum quem devehunt sanguinem dilutiorem reddat, sed etiam ut exinde à numerosissimis vasis lymphatico-venosis exteriorum uteri ambitum occupantibus partim hauriri, & ad receptaculum Pecquetianum transvehi possit: quæ cum ita sint, facile quivis, ni fallor, intelligere poterit, cur & quomodo, sup-  
pressis



pressis menstribus, fermentum iis excitandis aptum in venas transmeat, naturalem sanguinis diatesin mutet, gravissimosque ut plurimum morbos pariat: facile quoque, opinor, nunc intelligetur cur & quomodo, statim ferè à partu, succus lymphatico lacteus, quo graviditatis tempore fœtus nutriebatur, ad mammas amandetur, uti articulo 33. explicui. Non modò statim à Conceptione incipit fieri coalitus vasorum lymphatico-arteriosorum uteri, cum vasis lymphatico-arteriosis ovi membranarum, ut antehac explicatum fuit; sed & prima intra ipsummet ovum recondita, invicem implicata & convoluta, partium omnium fœtus delineamenta, intestinâ fermentatione, à vegeto virilis seminis spiritu excitatâ, sensim explicantur & evolvuntur: ita ut ejus delineamenta eâ, quâ par est, ratione paulatim disponantur, ut à matre supeditatum lymphatico-lacteum succum ipsis nutriendis & rectè conformandis dicatum, intrâ textum suum interius admittere queant.

Statim atque tenerrimi parietes vesiculæ in Cor abituræ, sat firmum substantiæ modum, ac proinde vim quandam Elasticam adepti sunt, tota hæcce vesicula, quam is, quem continet, liquor in sanguinem citò mutandus, ut potè diversorum principiorum suorum exaltatione fermentescens, tenui suo halitu vaporoso indefinenter perflât, expansione suâ, quantum potest, dilatat: tota, inquam, hæcce vesicula quantitate & nisu diversorum succorum diversa ipsam constituentia vasa subeuntium, juvante proprio Elatere, contrahitur, ac deinceps eadem ratione dilatari & contrahi pergit, quâ primâ vice dilatata & contracta fuit: & hæc est, ni fallor, genuina ratio, quâ punctum saliens, seu Corculum fœtus primos vitales motus suos exorditur, uti fusè nec non evidenter, *capite ultimo novi tractatus mei de Structurâ, & causis motus naturalis Cordis*, Physico-mechanicis rationibus demonstravi. Primi autem vitales Corculi fœtus motus, licet admodum debiles sint, lentæ tamen circulationi humorum in exiguißimo illius Corpore promovendæ atque sustinendæ sufficiunt: verum fœtu in dies crescente, & majore humorum alibilium copiâ indigente, cor solâ vi sibi ingentâ, sanguinem ac consequenter succos alibiles ex ipsomet sanguine elicitos, ad singulas partes jam multum auctas, & ab ipso remotas amandare non posset, nisi cerebrum, ad quod eum, quo irrigatur sanguinem amandat, ipsi vicissim spiritus animalis affluxu vires adderet, atque adeò ambo deinceps, mutuâ officii necessitudine, ita simul conjuncta sunt, ut alterum alterius subsidio sine animalis interitu diu privari nequeat: posteaquam omnes & singulæ fœtus partes per novem circiter menses in utero muliebri nutritæ fuerunt, eâ scilicet ratione, quâ *sub finem novi tractatus mei de Structurâ*  
& cau-



& causis motus naturalis cordis explicui ; is è Cavitate illius excluditur, auctâ scilicet vi Elasticâ diversorum ductuum quibus viscus illud contextitur , ut suprâ planè explicatum fuit.

FINIS.



JOH.

Extracted from P. Verheyen: Supplementum anatomicum  
sive Anatomicum corporis humani Lib. secundus.





52517/p  
JOH. JACOBI

# MANGETI

Med. Doct. & Regis Prussæ Archiatri.

DISSERTATIUNCULA ANATOMICA

DE

# FORAMINE OVALI

HUJUSQUE IN FOETU VSU:

In ulteriorem elucidationem eorum quæ à Clarissimo PHIL. VERHEYEN, in lite super hoc Argumento motâ contra peritissimum Anatomicum Parisiensem D. MERY, in Supplementi Anatomici fine afferuntur.

**E**X quô de Sanguinis Circulatione, deque ejus etiam necessitate in fætum usque, in uterô maternô conclusum, productâ, per Immortalis Harvei demonstrationes constitit: Anatomici unô ore omnes, pro supplendô pulmonum, in fætu à respiratoriô munere feriantium defectu, proque sanguine commodè, à venâ cavâ in sinistrum cordis ventriculum, atque hinc in aortam derivandô, sine pneumaticæ machinæ auxiliatricibus manibus, in adultis prorsus necessariis, foramen, Ovale communiter apud eos à figurâ dictum, ac præterea canalem arteriosum, assignarunt.

Sic magnus ille Circulationis ædificator Harveus; *cum major numerus, inquit, animalium pulmones non habentium sit, quàm habentium; & similiter major numerus sit eorum qui unum tantum ventriculum cordis, quàm qui duos habeant: proclive est statuere in animalibus ἐπὶ τὸ πλὸν & in universum, sanguinem apertâ viâ, è venis in arterias per cordis sinum transmitti. Consideravi mecum, quòd etiam in embryonibus iis, qui pulmones habent (quandoquidem, ut suprà dicimus*



cimus, à respiratoriò suò illi pulmones feriantur officio, nec aliter in iis embryonibus seres habet, quàm in illis animalibus quæ, ut vulgò creditur, pulmonibus prorsus destituuntur) idem apertissimè constet. Nam in fatu vasa cordis quatuor (videlicet vena cava, vena arteriosa, arteria venalis, & aorta, sive arteria magna) aliò modò uniuntur, quàm in adultò: Quod omnes Anatomici nòrunt satis. Primus contextus & unio vena cava cum arterià venosà, (quæ fit priusquàm cava in dextrum ventriculum cordis se aperiat, aut venam coronalem emittat, paululum supra egressum ab hepate) anastomosim lateralem exhibet, hoc est foramen amplum, patens, ovali figurà pertusum, è cavâ in arteriam illam (veteribus scilicet sic dictam) pervium; ita ut tanquam per unum vas, per illud foramen sanguis de venâ cavâ in arteriam venosam, & auriculam cordis sinistram, usque in ventriculum sinistram, liberrimè & copiosissimè dimanare possit. Insuper in illò foramine ovali, è regione quâ arteriam venosam respicit, operculi instar membrana tenuis & dura est, foramine major, quæ postea in adultis, operiens hoc foramen & coalescens undique, istud obstruit omnino & propè obliterat. Hæc, inquam, membrana sic constituta est, ut dum laxè in se concidit, faciat adpulmones (imos scilicet pulmones, seu potius truncum venæ ex iis elabentis) & cor viam, resupineatur, & sanguini à cavâ affluenti cedat quidem; at ne rursus in cavam resluat, impediat. Ut liceat existimare in embryone sanguinem continuò debere per hoc foramen transire de venâ cavâ in arteriam venosam, inde in auriculam sinistram cordis, postquam ingressus fuerit remeare nunquam posse. Altera unio est vena arteriose, (quæ fit postquam vena illa, è dextro cordis ventriculò egressa, in duos dividitur ramos) estque tanquam, duobus dictis, tertius truncus, & quasi canalis arteriosus, abhinc in arteriam magnam obliquè ductus & perforatus: ut in dissectione embryonum quasi due radices arterie magna è corde exorientes appareant &c. Sic etiam Clariss. Louverus magni sui magistri Harvei vestigiis pressò pede, suò de Corde Tractatu, insistens, sic habet. Antequàm cordis musculum demanù dimittamus, superest ut advertamus quòd in fatù adhuc in uterò conclusò, ubi respiratio liberè fieri non potest, & proinde totus sanguis per pulmones pertransire necesse nondum habet, providè cautum esse, ut maxima pars ejus alià viâ transferatur. Quippe in fatù nondum exclusò immediate infra tuberculum (eò loci ubi vena cava ascendens cum descendente congressa, alveum suum in auriculam cordis exonerare parata est, à subiectâ pinguedine elatum, & notatu valdè dignum) foramen (ovale dictum) in venam pulmonalem proximè adiunctam rectà ante sinistri ventriculi fores aperitur, per quod maxima pars sanguinis à venâ cavâ reducti, immediate ante dextri ventriculi limen, in venam pneumonicam infusa, cum reliquo sanguine à nutritione pulmo-



nis redeunte simul in sinistrum ventriculum demittitur. Ne autem eadem viâ redeat, Membrana quedam undique foraminis hujus limbo, nisi in parte infimâ, atexitur, & tanquam velum infra ostij ejus infimum ambitum in vena pulmonalis trunco laxè dependet, adeo ut sanguini à venâ cavâ affluenti facile cedat, & fores quasi ultro pendat: Ex adverso autem latere, si sanguis è venâ pulmonali in venam cavam remeare fortè urgeatur, membrana ista, primo sanguinis appulsu, vena pulmonalis lateri aetè applicatur, adeoque incursum ejus omnino repellit, non absimili prorsus modo ac ductus ureteris inter duplicem vesicae tunica perforatus, liberam & apertum urine influxum facit, refluxum verò omnino prohibet. Et siquidem sanguinis reliqui in ventriculum cordis dextrum influentis, & ab illò in arteriam pulmonalem ejecti, copiam omnem adhuc per pulmones pertransire nulla cogit necessitas, ideò ad partem ejus à pulmone divertendam canalis insuper arteriosus ex arteriâ pulmonali in aortam ipsam aperitur, unde sanguis è dextro cordis ventriculo expulsus, magnâ ex parte per istum canale in aortam traicitur, atque unâ cum reliquo sanguine per totum corpus dispergitur. Cum autem fetus excluditur, & respirare incipit, foramen & canalis iste, ut pote quibus nihil ultra opus est, sensim & in dies coalescunt, donec hoc tandem penitus occluditur, ille in ligamentum impervium paulatim degenerat. Sic præterea Clariss. Gualterus Needham elegantissimò suò de formato fætu tractatu, scribit. Juxta cor fetus binæ occurrunt anastomoses, quarum nota sunt nomina, foramen scilicet ovale, & canalis arteriosus. Prius illud ex dextrâ auriculâ aperitur in vena pulmonalis finem, sive sinistre auriculæ initium, utriusque nempe consinium; ubi sanguinem in sinistrum cordis ventriculum, dextro prorsus insalutato, transfundit. Canalis arteriosus paulò ultrâ valvulas sigmoides in arteriâ pulmonali incipit, & transversâ lineâ ad aortam pergit, eâque paulò minor est; ceterè venâ arteriosâ, quatenus inde ad pulmones pergit, major. Amplior est quâ cor spectat, angustior quâ aortam: Ut vel inde constet viam latam, sive regiam esse quâ circuitus sanguineus pulmonibus feriantibus perficitur. Idem postquam contra Primirofium & alios, regressum sanguinis ex aortâ per hunc canale in pulmones, pro iis sanguine arteriosò spirituque vitali irrorandis, solidis innixus rationibus pernegavit, tandem addit. Conceptus intra uterum latitans se componit ad morem eorum animalium quæ unicâ tantum in corde cavitate gaudent, neque pulmone donantur. Quod ipsum olim Harveo notatum. Licet enim hic binæ sint, cruor tamen unicam tantum unâ eademque circulatione pertransit. Quicquid nempe in dextrum ventriculum recipitur mox ad aortam sinistro prætermisso pergit. Quod autem in levum infunditur, illud immediatè ex cavâ per foramen ovale in-



fluit. Neque quicquam amplius in pulmones distribuitur, quàm private partis nutritui sufficit, cujus residuum in sinistram cavitatem eodem modo lege circulationis reducitur, quo è reliquo corpore cruor in cavam redit. Taceo jam plures alios doctissimos Anatomicos in eodem argumentò, tanquam in re quàm apprimè demonstratâ, plenè consentientes, pro nimia prolixitate devitandâ, & unicum tantum rursus adfero Celeberr. Joh. Munnicks, cujus in suo de Re Anatomicâ verè præclarò libellò hæc sunt ipsissima verba. *Notabile est in venâ cavâ ascendente prope cor ostium amplum, quo transitus patet è cavâ in venam pulmonalem, à parte hujus vene obtentâ membranâ tanquam valvulâ munitum. Canaliculus item ex arteriâ pulmonali in aortam protensus, ob tunicarum crassitiem arteriosus nuncupatus. Ita sanguis qui per venam cavam ascendente è partibus inferioribus accedit per foramen ovale in venam pulmonalem & sinistrum cordis sinum omnis ingreditur. Qui verò per venam cavam à superioribus descendente movetur, in dextrum cordis ventriculum omnis cogitur: Indeque partim per arteriam pulmonalem, in pulmonem & porro per venam pulmonalem ad sinistrum ventriculum circulum suum absolvit: partim in arteriam pneumonicam expulsus per canaliculum istum arteriosum in arteriam magnam transfunditur. Utinamque hanc viam, foramen puta ovale & canaliculum arteriosum, etate procedente natura paulatim obliterat, neque in adultis reserat, nisi cum graves causæ vias consuetas impediverunt: Et quidem foramen ovale clauditur non aliâ materiâ, quàm suâ ipsius valvulâ; sic ut valvula semper maneat valvula corpore, valvula tenuitate, & valvula perspicuitate. Pulmo rubicundior conspicitur, atque initiò fetus formationis, ponderosus admodum & densus est; sed à tertio circiter gestationis mense in dies rarior evadit & levior, magisque expanditur ad partum maturo jam fetu: Blanda nimirum dilatatione aerem tenuiorem atque puriorem (si ita credere fas est) quo amnios membrana repletur, haurit. Nihilominus tamen aqua injectus subsidet, tenuior quippe puriorque ille aer in tantum vesiculosam hujus visceris substantiam implere & dispendere nequit, ut in aqua fluitet superficie: Quod fieri solet, si aerem eternum crassiores semel tantum inspiraverit.*

Sententia de Foraminis Ovalis, ut & Canalis Arteriosi, usu, hætenus ex Præclarissimis Anatomicis fusè explicata, & tot demonstrationibus ac autoritatibus suffulta, contradicentes unquam nullos invenire posse videbatur. Interea tamen jam ab aliquot annis peritissimus Anatomicus Parisiensis, idemque Illustrissimæ Academiæ Regiæ Scientiarum Socius, Dominus Mery, tanquam alius Jsmael, cujus manus contra omnes, se Anatomicorum omni cætui antagonistam exhibuit, & satis credens officiosè ipsis concessisse quòd sanguis de arteriâ pulmonali in aortam per canalem arterio-

sum



sum, secundum eorum mentem, etiam contra Primrosij chimericam assertionem, derivetur; pernegavit illum ipsum itidem sanguinem de cavâ in pulmonalem venam, cursu naturali, per foramen ovale devehî; sed potius mutatis naturæ legibus, ex hac in illam recurrere, ad defectus aeris supplementum in fœtu, & usus nescio sanè alios quos. Primis quibus ista publicabantur mensibus, existimabam ego, quod hæc à sanissimæ mentis Autore, & verè peritō Anatomico, per jocum, pro ingeniis Anatomicorum tunc temporis existentium, in propositione prorsus paradoxâ, sed rationibus aliquot ingeniosissimis suffultâ, exercendis afferrentur. Verùm in sequentibus vidi ab eò seriò cum Publico agi, dum eandem quæstionem in Academiâ Regiâ Scientiarum pluries agitât, sibi que hâc in parte adversarios Præclarissimos Anatomicos, aut ignorantia, aut minoris in phænomenis anatomicis explorandis, sedulitatis redarguit. Hæc agendi ratio bilem non parum movit in aliquibus ex iis qui primi in arenam descenderant contra novum hunc athletam; inter quos præcipui sanè fuerunt famigeratissimi Viri D. Du Vernay Tavvri, Sylvestre, Bussiere, atque hic ipse Autor noster Verheyen, qui tam validis armis decertarunt, ut adversarij sui ferrò aliquando ipsos debilitari minimè crederetur possibile. Verùm ignoratur quô tandem fatô, an indulgentiâ ac comitate, aliâve ratione in gratiam unjûs è celebrioribus suis sociis mota, Illustrissima Regia Societas Parisiensis, (cui tam multa, imò dixerim verè magnifica debemus, non tantum in omnibus Mathematices partibus; sed etiam in Physicis ac Medicis) auditis & ponderatis utrinque argumentis, dubitativè hac in lite pronunciavit, dicens in suâ anni 1703. Historiâ. *Mirum videretur si utrumque Systema, scilicet tam illud quod contra recursum sanguinis è venâ pulmonali in cavam per foramen ovale à D. Mery adversariis cûsum est, quàm illud quod ab eodem Mery pro hoc recurso propugnando excogitatum fuit, verum foret. Interea tamen hoc non prorsus impossibile credimus.* Huic revera pronuntiationi depromendæ, non parum favit observatio Clariss. D. Littræ itidem in historiâ Anni 1701. prædictæ Illustrissimæ Academiæ allata, quâ non semel; sed præcipuè ac novissimè in homine quadragenariò se foramen ovale apertum eâ ratione reperisse asserit, quâ introitus è venâ pulmonali in cavam, non contrâ concederetur. Siquidem illius orificium à parte venæ pulmonalis triplò grandius erat, quàm à parte venæ cavæ; sicque consequens videbatur primum impulsus sanguinis à parte venæ pulmonalis, ac ejusdem introductionem in cavam fieri debere. Verùm ignoscant Illustrissimi Viri, ipseque etiam observationis Autor Præclariss. Littræ, si regeram à statu monstroso ad rerum naturalem constitutionem nihil concludi posse;



& in hac observatione cum non minus monstrosa fuerit foraminis ovalis major expansio à parte venæ pulmonalis, quàm à parte venæ cavæ; ac erat ejusdem foraminis in quadragenariò apertura, nihil inde concludi posse pro sanguinis cursu naturali, cum præterea difficile sit assignare cui demùm usui, & quò tempore monstrosa illa apertura, ejusque varia amplitudo ab utraque sui parte excitata sit.

Inutile forsitan fuerit ut contra usum à peritissimò Mery formini ovali assignatum, post tam multos præclaros Viros ipsumque Autorem nostrum aliquid ulteriùs promam; verùm ne in dirimendâ lite tam celebri, per eos apud quos agitata est, prorsus asymbolos discedam, paucis rursus præcipua rationum momenta quibus suam superædificat sententiam D. Mery, perstringam. Illa autem ad duo propriè reducuntur; quorum primum ex Mechanices legibus, ut reputat Celeberrimus ille Anatomicus, petitum est: Secundum verò ex necessitate quæ incumbit sanguini aëre prope vacuo, & propterea totali suæ massæ circulationi per longas membrorum corporis ambages non parum inepto, de viâ rectâ, in prædictam circulationem ipsum deducente, per foramen ovale, tanquam per commodum diverticulum, ex parte regredi, ut ventriculo cordis dextrò, è quò exierat, & unde in pulmones amandatus fuerat, restitutus, in eosdem pulmones rursus trudatur, sicque aorta ab hac saltem oneris circulandi portione levata, reliquum quod in ipsam è sinistrò cordis ventriculò influit faciliùs devehat.

Primum quod attinet, illud hoc innititur fundamentò, quod scilicet quantitas liquoris per vas aliquod traiciendi, mensurari debeat ad capacitatem vasis, sive alvei per quem traicitur, quodque cum arteria pulmonalis multò capacior sit aortâ, necessariò plus sanguinis per illam quàm per hanc excurrere debeat; quæ major quantitas aliunde sanè in ipsam derivari nequit, quam quia per foramen ovale non minima pars sanguinis ex pulmonibus elabentis in cavam refluat, qui ventriculo dextro cordis infusus, ex eò per pulmonalem arteriam in pulmones influat, sicque quantitatem ejus augeat. Verùm, ut bene jam regesserunt Clariss. alij Viri, interquæ eos noster Verheyen, hallucinatur diligentissimus Anatomicus, dum ex solâ capacitatem vasorum metitur quantitatem liquidi per ipsa devehendi. Sic enim illis in locis ubi Rhodani nostri alveus forsitan millies quàm in alijs capacior reperitur, millies plus aquæ diffunderet; quod tamen veritati minimè consentaneum est, siquidem tot prorsus aquæ pedes cubici in contractissimâ illâ alvei parte quæ sub monte *Credan* dicto est, quæque saltu commodè transiliri potest, determinato tempore effluit, ac  
in



in alijs ejusdem alvei partibus quæ maximæ reperiuntur capacitatis, dum nempe per celeritatem motus abundè pensatur id omne quod in quantitate spatij deficiebat. Et respectu vasorum corporis nostri, quis est ille qui vel tantùm à primò salutarit Anatomiam limine, qui nesciat venas crurales multò ampliores esse lociis suis arteriis, & tamen non plus revehi per illas sanguinis quàm per has devectum est; siquidem quicquid in se concludunt prædictæ venæ hujus liquidi, arterijs debent, nec in eas priùs amandatur ex his, quàm post impensas in nutritione partium factas, materiam transpirationis ex ipsò eductam, ac lympham in proprios suos canales transmissam? Non itaque valet Axioma mechanicum à D. Mery in suæ sententiæ fulcimentum allatum, nisi sub certis restrictionibus, scilicet quòd major aut minor capacitas vasorum, sit mensura liquorum ea traicientium, dummodo eadem celeritate illa percurrant. Jam verò illa restrictio prorsus destruit quicquid à D. Mery ædificatum est; pernegamus etenim quòd eadem celeritate sanguis moveatur per totum arteriæ pulmonalis tractum in fætu, quàm movetur in aortâ: Nam sive spectes vim utrobique moventem, sive viarum constitutionem, ac variam in iis resistantiam, reperies maximam inter liquidi hinc aut inde emissi in celeritate interesse debere differentiam. Vis movens à parte sanguinis in arteriam pulmonalem abeuntis, est ventriculus cordis dexter, quæ multò sanè inferior est illi quæ à ventriculò ejusdem cordis sinistro proficiscitur, quæque sanguinem in aortam maximò trudit molimine. Viæ quas traicit arteria pulmonalis in fætu sunt ita impeditæ, resistentes, & ut ita dicam quasi ineluctabiles, propter flacciditatem pulmonum in se ipsos concidentium, ut vix aliquid pro proprio nutrimentò in eos permeare possit: Viæ verò aortæ sunt liberæ, expeditioresque etiam liquori contento fiunt ex quò embryo in uterò maternò movetur, quia scilicet sanguis per varios musculos ac fibras musculosas in totò corporis habitu, ac ipsis visceribus sic truditur, ejusque motus in vasis suis acceleratur. Quod autem per impeditas pulmonum vias sanguis commodè traicere non possit, gratis non dicimus, sed demonstrationi assertio nostra innititur, de quâ audiatur Clariss. Pitcarnius in suis Dissertationibus Medicis solidè differens. *In fætu*, inquit, *totus ferè sanguis circuit è venâ cavâ, & arteriâ pulmonis, in pulmonis venam, & arteriam magnam, pulmone neglectò. Pulmo enim non inflatus parum sanguinis admittit. Quippe cum pulmonis vesicula inflatione fiant Spharica, erunt deficiente inflatione spharoides; & oblonga facta flaccescent: Tum verò poterunt & debebunt ipsæ à circumstitis vesiculis per totum ferè ambitum contingi, vasaque sanguifera ipsas in-*



tertextentia comprimi & occludi. Accedit quòd rami trachea appendan-  
 tur ad angulos cum inferiore trachea acutos, cum superiore autem ob-  
 tusos; unde fit ut ipsi semotà inflatione ipsisque appensa vesicula valide com-  
 primant ramos vesiculasque inferiores & interiores: Et circulatio san-  
 guinis per pulmonem non inflatum vix ulla celebretur. Quare cum vesti-  
 cula compressa resistat sanguini è ventriculò cordis dextrò erumpenti  
 magis quam resistit canalis ille patens & non compressus, qui ducit ab  
 arteriâ pulmonis oriente in arteriam orientem aortam, oportet eum sanguinem,  
 qui anastomoseos venosa orificium praterlabitur totum ferè ingredi anastomosin  
 alteram sive arteriosam, qua ejus facile capax est. Et in sequentibus addit.  
 Inflatis foetus quam primum in auras evasit, aeremque hausit, pulmo-  
 num vesiculis, facile poterit sanguis universus per vasa iis intertexta &  
 intercurrentia circulari: Nam cum inflatione evadant spherica, non  
 poterunt inflata nisi in paucissimis & minimis aliquot partibus à vicinis  
 similiter inflatis premi. Quare tota ferè vasorum sarrago erit pressionis  
 expers & immunis, ruetque facilius & majori copiâ sanguis è dextrò  
 cordis ventriculò in arteria pulmonis eam partem qua ultra canalis arte-  
 riosi obliquum, & paulò minùs capacem exortum protensa rectâ ducit  
 in pulmonem, cum ibi minor jam sit resistantia amotò pondere vesicula-  
 rum flaccidarum & vasorum qua priùs super se ipsa replicabantur. Ideo-  
 que sanguis liberius se per pulmones in venam pulmonum traiciens,  
 facile occludet anastomosin venosam, arietando semper in valvulam san-  
 guini in cavam redituro oppositam; valvulaque illa aequali utrinque  
 impetu petita, statim immota transitumque omnem negatura, constituetur.  
 Hæc à Viro Clariss. allata satis valida sunt; verùm ut demonstrati-  
 oni promissæ nihil desit, atque abundè constet quòd sine respiratione,  
 quæ in fætu, concedente etiam D. Mery, prorsus desideratur, mas-  
 sa sanguinis per pulmones meare & remeare nequeat, consulatur  
 experimentum à nobis pluries institutum, quod quia à Clariss. D. Jo-  
 hanne Fantonò, in suâ vere egregiâ Corporis Humani Anatomia  
 ad usum Theatri accommodatâ, pereleganter describitur, propriis  
 ejus verbis hic trademus. Quotiescunque, inquit, editum in lucem  
 animal inchoavit respirationem, sanguis è venâ cavâ effusus in cor  
 mittitur, à corde in pulmones, totusque à pulmonibus reflus alterum su-  
 bit cordis sinum, idemque ab hòc sinu in aortam truditur: Sed nisi ins-  
 piratio quamprimum renovetur, & alterna fiat concidentia thoracis,  
 ejusdemque erectio & ampliatio, traïci sanguis non posset per vias pul-  
 monales; unde sanguinis fluxus à cavâ in cor, à corde in pulmones,  
 à pulmonibus iterum in cor, & à corde in aortam interciperetur, ma-  
 nentibus vasis sanguine turgidis, & pulmonibus lento cruore turgentibus,  
 tanquam spongia humore imbuta sub laxo torculari non pressa. Praclaro  
 autem experimento rei veritas confirmatur. Vivì canis pectus aperitur,

explica-



*explicaturque: Pulmo concidit, nec ultrò aerem recipit; aut recepto turgescit, ut jam indicavimus: Interim cor movetur; at frustra in pulmonalem arteriam, cum, contrahitur, sanguinem trudit: Frustra cor laxatur, ut in sinistro sinu pulmonalem sanguinem exipiat. Cava utraque vena, & auricula, & dexter ventriculus, & pulmonalis arteria impedito cruore turgescunt: Etenim sanguis ferè nullus, concidente jugiter pulmone, per ipsum traicitur. Interea aerem si quisquam per asperam arteriam immittat, omnia restitui jucundissimè videbit; depleri venas, & cor, & auriculam, & arteriam: Tum pulmonem, partim antiquo sanguine exonerari, partim novo impleri. &c. Hisce sic demonstratis, quis non videt, non tantum impossibile esse ut totus sanguis in fætu circulationes suas per pulmones peragat; sed etiam quòd illa ejus portio, quæ vi fibrarum ventriculorum cordis dextrum claudentium in ipsos projicitur, dum impeditas reperit vias, præcipuè usque dum canalem arteriosum sibi satis patentem aperuerit, in arteriæ pulmonalis orientem truncum eum impetum faciat, qui illum non parum distendat, ac propterea sit in causâ cur ejus capacitas aortæ capacitati majore evadat? Ea autem expansio, seu vis eam efficere valens, cum eò ipsò tempore cesset, quò sanguis sibi viam satis patentem aperuit per prædictum canalem; nullatenus interea pertimescendum cum Solertissimò D. Merio, ne inde tandem vasis disruptio oriri possit. Præterquàm quòd etenim membranaceæ partes in immensum propè à liquidis conclusis, vel infusis, in statu tum naturali, tum morbosò, aut præternaturali, sine tali disruptione, quotidie extenduntur: Arteria pulmonalis in sui exortu firmioris est texturæ, imò compactiore in fætu pulmonis corpore, ad sui tutelam, si ita opus sit, undique ita cincta, ut non facilè lacerari queat. Atque hæc satis contra primum rationum momentum à Peritissimò Merio allatum: Secundum quod spectat; in eò videmus se Solertiss. Anatomicum Naturæ nimis officiosum præbere, dum pro ipsâ à molestiâ ex parte levandâ, quæ ei pro sanguine circulationibus præ aeris defectu, ut ipse credit, minùs aptò, & integrò tamen, ni aliunde suppetiæ adveniant, per aortam in totum corpus diffundendo, indeque per venas ad cor reducendo incumbit; vias commonstrat compendiosiores illi priùs ignotas. Unicum hic vereor, pro diligentissimò Anatomicò; ne scilicet Natura alienis curis obtemperare ut plurimum minimè parata, ac eas quas sibi ipsa non aperuit vias calcare forsitan nescia, tam studioso duci pro recurso proposito non ausculet, ac tritas semitas decurrere malit; quàm in vias etiam ampliores sibi commonstratas deflectere. Et revera cui bono illud fieret? Nam ut taceamus quicquid pro absolutâ necessitate aeris ad circulationem sanguinis*



sanguinis faci' tandem, impugnandâ nobis suppeteret; anne commodius res suas perficeret natura, & nonne potiùs de Scillâ in Carybdim, ut dicunt, incideret, dum pro devitandis molestiis quas ipsi aorta per innumeras suas ramificationes in totum corpus distributas, præbet; in pulmonum vias ineluctabiles, & unde priùs per canalem in arteriæ pulmonalis truncô, ad illam ipsam aortam excavatum, se magnâ ex parte expedire coacta fuit, tandem diverteret? Ibi ne aerem reperiret quô sanguis inductus ad circulationes commodius peragendas vigoraretur. Sed talis aer non aliàs quàm per respirationem in pulmones admittitur, quæ in fætu deficit? An ibi ejusdem sanguinis partes, ita conteri valebunt, ut se accommodent omni generi vasorum, etiam exiguissimorum, quô sic liberiùs, in omnes agantur corporis partes, & particulas? Sed in id requiritur rapiditas quædam motus quam sanguini communicare pulmones fætus flaccescentes minimè queunt? Anne saltem quod præcipuè intendere videtur D. Meryus, hic fiet recursus, ut sanguinis pars v. g. quinta, aut sexta commodius per pulmones circulans, aorta ab opressione quam tota massa ipsam alias subingrediens conciliaret, liberetur? Sed per experimenta ac demonstrationes suprâ probavimus nihil sanguinis per pulmones circulare posse, quàm quod pro ipsorum nutritione, vasorumque amplitudine aliquatenus conservandâ, pro eô tandem tempore quô fætus in auras educetur, requiritur; quodque non plenô alveô, sed guttatim, postquam sibi impositum perfecit pensum, in cordis sinistrum ventriculum destiliat. Concludamus itaque multò satius esse Naturam sibi ipsi permittere, quàm in ejus gratiam vias laboriosè perquirere, quas nullatenus acceptatura sit, aut acceptare possit. Verùm ne aliquid intactum relinquamus, & postquam satis, ut credimus, demonstratum fecimus, sanguinis massam per pulmones fætus traicere non posse, sicque ejus partem per foramen ovale è venâ pulmonali in cavam minimè regredi debere: Inquiramus rursus in naturam valvulæ prædicto foramini appositæ, ad ejusque situm, ut exinde manifestetur an talis regressus sit possibilis. Valvulæ natura seu Structurâ, depingente Clariss. Morgagnô, in suis Adversariis Anatomicis primis, cui omnino subscribimus, in vaccino fætû, qui commodius ad manum venit, à parte vene pulmonalis ita ampla atque insignis extat, ut non videatur quam ergo aliam sint valvule nomine appellaturi qui hanc non appellent. Dum autem specillum huic admoveatur, à parte quidem vena cave, nullo negotio, & quasi ultrò in pulmonalem id labebatur. Contra si ab hac venâ in illam teneratur traductio, tum valvula moram iniiciebat, tum ea prior liberè & facile elabendi

facile



facultas non dabatur. Illud accedebat, quod in ejus etiam quam dico, mora & impedimenti causa erat, chordula aliquot ad vena pulmonaris anticam partem limbum valvula alligantes: Quas etiam præstantissimo Ridleyo cognitæ video, quasque ille in humanis, ego in fætibus caninis frustra postea perquisivimus. In his una erat præ cæteris longè crassior: similesque admodum omnes erant earum fibrarum quibus mitralium, & tricuspidum valvularum limbi columnis cordis innectuntur. Quibus fibris, si rectè ego memini, nihil prohibet quin munere officioque etiam respondeant, ut nimirum in auricularum diastole contenduntur, attractaque valvulâ cruorem admittant, in sistole autem invicem remissæ, valvulâ que laxatâ, sibi viam claudere cruorem sinant, ne quâ de auriculâ venerit, in hanc confestim relabatur. Ut ut est, certè has fibras à parte vena pulmonalis non oportuit positas, si valvula non in hanc venam, sed in cavam concedere aditum debuisset. Similibus forsan demonstrationibus, circa valvulæ structuram, cedere coactus D. Merius, in Historiâ Illustriss. Societatis Regiæ Ann. 1703. confiteri paratus est circulationem in fætibus vaccinis ac ovillis secundum Harvæanum Systema perfici, at in humanis ac aliis multis animalibus, non item. Verùm quis nescit Naturam, unô eodemque tenore in suis operationibus progredi, & variationes rarò aut nunquam admittere? Sed præterea, etiamsi in fætû humanô valvula hæc non ita longè dependeat à parte venæ pulmonalis ac in fætû vaccinô, totque etiam cordulis non prædita, minùs resistat specillo, flatui, aut humori à parte hujus venæ in cavam immisso; resistit illa tamen ab hac parte magis, quàm à parte venæ cavæ in venam pulmonalem, è quâ liberri num præbet aditum: & hæc qualiscumque resistantia sufficit pro verò valvulæ officiò demonstrandô. Idem etiam patet per ejusdem valvulæ situm: Nam qualis esset illa mechanica, si pro difficultate regressus sanguinis è venâ pulmonali in cavam tollendâ, valvula ad illius orificium poneretur, quæ potius impedimento foret quam adiumento, dum scilicet sanguini contra circulationis naturalis leges vi quâdam impulso, viam ex parte clauderet: Et nonne satius esset liberum omninò orificium ipsi præbere quàm obicem inibi dare, dum à parte cavæ pro sanguinis itidem fluxû per foramen ovale præpediendô, nihil prorsus obiicitur. Atque hæc plus quàm satis, ut opinamur, pro Systemate Harvæi aliorumque Anatomicorum super foraminis ovalis usu, contra D. Merium defendendô.







# INDICULUS SPECIALIS

*Animadversionum ac Dissertationum Anatomiae Corporis  
Humani Philippi Verheyen, ejusque Supplemento  
in hac ultimâ Editione adjectarum.*

- A**nimadversiones in Anatomiam Blancardianam, & obiter in  
quasdam alias: Auctore Philippo Verheyen, cum adjectis hinc  
inde Notulis - - - - - *Appendicis Anatomiae pag. 1.*  
Epistola Anatomica ejusdem Philippi Verheyen, ad Clariss. Fride-  
ricum Ruyschium, cum Notulis itidem interfertis. *App. pag. 18.*  
Clarissimi Viri Raymundi Vieussens Responsio ad ea quæ leguntur  
Capitibus IX. & X. Tractatus III. Anatomiae Corporis Humani  
Celeberrimi Viri Philippi Verheyen, super Corde ejusque functio-  
nibus. - - - - - *App. pag. 25.*  
Excerpta ex ejusdem Raymundi Vieussens Epistolis ad Illustrissi-  
mas Universitates, Patavinam ac Bononiensem *App. pag. 31.*  
Excerpta ex ejusdem Epistolâ ad Illustriss. Societatem Regiam Lon-  
dinensem. - - - - - *App. pag. 33.*  
Raymundi Vieussens Dissertatio Anatomica de Structurâ & usû Ute-  
ri ac Placentæ Muliebris, 82. paragraphis comprehensa: & ea om-  
nia quæ ad Generationem pertinent illustrans. *Appendicis ad Supple-  
mentum. - - - - - pag. 1.*  
Joh. Jac. Mangeti, Regis Prussiæ Archiatri, Dissertatio Anatomica  
de Foraminis Ovalis in fœtu usu &c. *Append. ad Supplem. pag. 47.*





U.S. DEPARTMENT OF THE INTERIOR

BUREAU OF LAND MANAGEMENT

WASHINGTON, D.C. 20250

OFFICE OF THE ASSISTANT SECRETARY

FOR LAND MANAGEMENT

1015 G STREET, N.W.

WASHINGTON, D.C. 20250

TELEPHONE (202) 733-6000

TELETYPE (202) 733-6000

FAX (202) 733-6000

INTERNET WWW.BLM.GOV

MAILING LIST

NAME

ADDRESS

CITY

STATE

ZIP

PHONE

FAX

EMAIL

DATE

TIME